

MEJE PO CARTE COPIYA TATINA PABLO CORINTO TOMARAPIWI TATINATSI

Meje poxonaē Pablo tatina Corinto tomarapiwi

1 ¹Xan, Pablon, pacata tinatsi Nacom peichichipaexae xua tana newabiwa xua tana neexanaewa Jesucristo pia peitorobi jiwi jiwana tatsin. Iruno Sōstenes pon iru pejume cowuntsin Jesucristo, baponbe panbe pacata tinatsi. ²Paxam pomonae painya nejume cowuntsi jiwi pam Corinto tomaratha. Barapomonae pam pacata tinatsi pomonae Nacom piamonae tatsi pam painya neyawa jinompaexae Cristo Jesús. Nacom paca waba painya nenajuntu coyene wunaē exanaenexa Nacomtha. Pacata tinatsi daxita nacuapiwi pam, pomonae iru painya nejume cowuntsiwixae pam Jesucristo, xua pomonae painya newan ununeibiwi Jesús pewan poxonaē pawuqueibame Nacomtha. Bapon Jesucristo Wanacanamataxeinaein iruru daxita nacuanthapiwi pomonae pejume cowuntsiwi barapomonae pia Pecanamataxeinaeinchi tatsi. ³Barabu Nacom Waxa, iru Jesucristo pon jiwi Pecanamataxeinaein juntema jinompa paca exanaena. Matautano barabu baponbe paca yawenaena pia paca necaantobewaxae.

Meje poxonaē Pablo tawuca Nacomtha Corinto tomarapiwi

⁴Daxita matabi tsaibi Nacomtha pacata tsipaēbeibatsi, jan tsaibin: “Nacom maisa juntu coyene weiweinan xua barapomonae tana neyawenaewa xua Cristo Jesús peantobexae barapomonaetha”, jan tsaibin. ⁵Painya neyawa muxuna jinompaexae Cristo, daxota Nacom peayapuswa jopa juniya paca catsiyo xua xaniwaicha painya nepaēbiwa pejume diwesi. Barapon Nacom paca cata po coyene beta yabara painya neyaputaewa bapon. ⁶Po diwesi paca tsipaēbatsi Cristo yabara xua bapon paca cana exana painya nejinompaewa bapon nexa baxua

anoxuae xaniwaicha paexanaponame. ⁷Paxam paxeiname pocotsiwa Nacom pia Pejumope t̄nax̄u tatsi paca cata, daxita xua pocotsiwan panantawenoname xua betiya painya nejinompaewa tsane Nacom nexa. Daxita baxuan paxeina dubenanaebiyaename poxonae cataunxuae paw̄nae ewatsiname xua poxonae Jesucristo po mataqueitha equeicha patopeicaena pon Wanacanamataxeinaein. ⁸Nacom paca yaweneibina xua paaj̄unt̄s̄uya jinompaename beya poxonae Jesucristo equeicha patopaetsica. Dapon xain aibi tsane pon paca yabara paeba xua painya nenatsicuentsiwa xua abe painya neexanaexae Nacomtha xua poxonae equeicha patopaetsica pon Wanacanamataxeinaein Jesucristo. ⁹Nacom bara ataya exaneiba pocotsiwa pia petsiw̄nae muxu dutsiwan. Barapon Nacom paca waba painya neyawa muxuna jinompaenexa tsane Jesucristo pon Wanacanamataxeinaein, Nacom Pexanto tatsi.

**Meje poxonae Pablo yabara paeba po coyene pomonae
pejume cow̄ntsiwi Cristo xua natsaba nacana exana**

¹⁰Tamonae pam, paxam pomonae ir̄u painya nejume cow̄ntsiwixae Jesucristo. Jume daunweya paca tsipaebatsi taj̄unt̄u coyenetha tsipei daxita paxam Jesucristo piamonae tatsi pam pon Wanacanamataxeinaein. Caemonae peb̄ur̄ya cuita pacueicueijan tsurubenaebiyama. Jopa pana najume matsontsonobinde xua daxota painya nenatsabiwam tsipae. Jame maisa peb̄ur̄ya pananta xeinare xua be bara caemonae pam. ¹¹Tamonae pam, pomonae ir̄u painya nejume cow̄ntsiwixae Jesucristo. Daxota baxua paca tsipaebatsi, yaitama yab̄uyo powa pew̄n Cloé piamonae tatsi netsipaeba pinae paxam nantiya pana najume matsontsonoba dubenanaebiyame. ¹²Jume tan xua paxam jiwana xua barompaya tsanaya paeba, jeye: “Pablo yabara jume cow̄ntan pocotsiwa cuiduba”, jei. Ichamonae jeye: “Apolos yabara jume cow̄ntan pocotsiwa cuiduba”, jei. Ichamonae jeye: “Pedro yabara jume cow̄ntan pocotsiwa cuiduba”, jei. Ichamonae jeye: “Cristo yabara jume cow̄ntan pocotsiwa cuiduba”, jei. ¹³Daxita paxam jopa bewa barapo coyene paexanaem xua ainyamonaein pana naexaname. Cristo jopa pia coutha nanantar̄ubiya exanaeyo tsipei Cristo apara bara caein. Xan, Pablon, jopa apara paca tsit̄upaetsi naetotha. Jopa apara paca bautisabichi taw̄ntha xua daxota tamonae painya nenaexanaenexam. ¹⁴iPai jaibo! ¿Incane metha barichipaein? ¿Incane metha bautisabichipan? Daxota Nacom tsipaeban janje: “Nacom maisa j̄unt̄u coyene weiweinan xua barapomonae jopa tabautisabiwa”, jan. Saya meisa bautisaban Crispo ir̄ur̄u Gayo. ¹⁵Daxota dapon aibi pon itac̄upatsi xua pejeiwa: “Xan nebautisaba Pablo pew̄ntha”, xua pejeiwa. ¹⁶Jaina ir̄ur̄u Estéfanos piamonae tatsi bautisaban. Ichitha ichamonae jopa yabara nanta xeinaeyo xua tabautisabiwa bayatha. ¹⁷Cristo jopa neitorobiyo xua tabautisabinexa jiwi. Jame saya Cristo neitoroba

xua yabara tacueicueijeinexa pecapanenebiyae diwesi. Ichitha jopa cueicueijanyo icha be ichi pon bichocono cueicueijejei poxoru bichocono peyaputaexae. Ichi baxua exanaetsipan jiwi jopa yabara yaputaetsipae Jesucristo pia pecapanenebiyae diwesi xua poxonae Cristo naetotha tsitupa jiwi.

Meje poxonae Pablo yabara paeba xua Cristo xeina Nacom pia peayapusw̃wa tatsi xuano Nacom pia peyaputae coyenewano tatsi

¹⁸Ichamonae jopa beta yabara nanta xeinaeyo po diwesi xua Cristo petsitupaewa naetotha jiwi. Barapomonae yawa muxuna weraweracaena abe peexanaewan. Barapomonae jopa pejume cowuntsixae Jesucristo daxota nanta xeina xua barapo diwesi be tsita penamitacueinchi diwesi jumetsi. Ichitha ichamonae beta yabara nanta xeina barapo diwesi. Barapomonae Nacom capanenebiyaena abe pia peexanae cuiru coyenein tatsi weya. Barapomonae yaputane xua barapo diwesi bichocono peayapus̃ diwesi xua Nacom weya. ¹⁹Nacom Pejume Diwesitha baxua yabara paeba. Nacom jeye:

“Weraweraca exanaein peyaputae coyenewan, po peyaputae coyenewan xeina pomonae peyaputaewi. Pecuidubi coyenewan beban tsane, po pecuidubi coyenewan xeina pomonae peyaputaewi”, jei Nacom.

²⁰Pon xua peyaputaen ir̃u pon xua pecuidubin, ir̃u pon jume daunweya yabara cueicueijejei po nacuathe, barapomonae Nacom jopa tsita ainya cuichi. Nacom cui capona peyaputae coyenewan, po peyaputae coyenewan xeina pomonae peyaputae jiwi barapo cae pin nacuathe.

²¹Nacom xainyeya xeina peyaputae coyenewa. Nacom jopa copatsiyo jiwi xua peyaputaewatsi bapon, peyaputae coyenewatha po peyaputae coyenewa xeina pomonae jinompa barapo cae pin nacuathe. Jame Nacom ichichipa xua capanepa jiwi abe pia peexanae cuiru coyenein weya pejume cowuntsixaetsi poxonae pacueicueijan Nacom Pejume Diwesi. Barapo diwesi ichamonae tsita penamitacueinchi diwesichi.

²²Judiomonae ichichipa tane nawita Nacom pia pexeinya petsita itutsi coyenewan xua pejume cowuntsinexa tsane Nacom Pejume Diwesi. Seicaya nama griegomonae yabara jeita nawita barapo irathe pia peyaputae coyenewan xua pejume cowuntsinexa tsane Nacom Pejume Diwesi. ²³Ichitha paxan payabara cueicueijan Mesías pon naetotha tsitupa xua jiwi abe pia peexanae cuiru coyenein tatsi. Barapo diwesi judiomonae jopa be jume jejeyo poxoru tsita ajumebetsi. Seicaya nama pomonae jopa judiomonae naexanaeyo tsita penamitacueinchi diwesichi barapo diwesi. ²⁴Ichitha pomonae Nacom waba pomonae bara metha bequein judiomonae tsipae ir̃ur̃u pomonae metha bequein

jopa judiomonae naexanaeyo tsipae barapomonae jame Jesucristo jume cowuntatsi. Barapomonae nanta xeina xua Mesías xeina Nacom pia peyapusu coyenewa tatsi matautano xua Nacom pia peyaputae coyenewa tatsi xua jiwi pecapanenebiyaenexa tsainchi. ²⁵Pocotsiwa jiwi tsita penamitacueinchi diwesichi xua Nacom exana baxua apara bara jame Nacom bichocono tsita peyaputae coyenewatsi, beyacaincha po peyaputae coyenewa jiwi xeina barapo cae pin nacuathe. Matautano pocotsiwa jiwi jopa tsita peyapusutsi xua Nacom xeina baxua apara bara jame Nacom tsita peyapusu coyenewatsi bichocono, beyacaincha po peyapusu coyenewa jiwi xeina barapo cae pin nacuathe. ²⁶Tamonae pam, paxam pomonae iru painya nejume cowuntsiwixae Jesucristo. Paxam bewa pana nacayabara nanta xeinaem xua eta po jiwi pam xua poxonae Nacom aena paca waba. Bapoxonae pananta xeiame xua saya paxam caeyobe pam pomonae peyaputae jiwi pam. Barichi paxam saya caeyobe pam pomonae peyapusuya itorobi jiwi pam. Matautano paxam saya caeyobe pam pomonae peainya cui jiwi pam. ²⁷Nacom itapeta pomonae xua ichamonae yabara jeichi: “Barapomonae apara pomonae jopa peyaputae jiwi”, jei. Ichitha barapomonae Nacom pia peitapetsiwixae barapomonae aura exana pomonaetha pomonae abe peyabara paebixaetsi, pomonae bichocono peyaputaewi. Barapomonae pomonae pia coutha peyaputaewi penaexanaewixae aura tsane, tsipei yaputaena xua pomonae Nacom pia peitapetsiwixae tatsi xaniwaicha barapomonae peyaputaewi. Matautano Nacom itapeta pomonae xua ichamonae yabara jeichi: “Apara barapomonae pomonae pejuntu coyene faefaenaewi pejume cowuntsiwatha”, jei. Ichitha barapomonae pomonae Nacom pia peitapetsiwixae barapomonae aura exana pomonaetha pomonae abe peyabara paebixaetsi pomonae pia coutha penayabara nanta xeinaewa xua bichocono pexeinaewa peajuntucoyenesuwa. ²⁸Nacom itapeta pomonae barapo cae pin nacuathepiwi jiwana, pomonae pecui pawu jiwi xua piamonae peexanaenexa. Barapomonae pomonae ichamonae abe peyabara paebiwichi, matautano xuano pomonae ichamonae jopa petsita ainya cui jiwichi. Nacom itapeta pomonae jopa peainya cui jiwi xua penajume tsita itapeinya xeinaenexa xua Nacom jopa peitapetsiwa pomonae pia coutha penacayabara nanta xeinaewa xua peainya cui jiwi. ²⁹Daxota dapon aibi pon peitacupaewatsi xua Nacom peitabaratha atsaquiya penayabara paebiwa xua peainya cui jitonxae. ³⁰Nacom paca exana xua painya neyawa jinompaewa Cristo Jesús pia peajuntuypapusuwa tatsi. Matautano Nacom naca exana xua xeinatsi Cristo Jesús pia peyaputae coyenewa tatsi wayaputaenexa Nacom. Matautano Cristo naca cana exana xua wajuntu coyene xanepanaewa xua jopa wanatsicuentiwa xua abe waexanaexae Nacomtha. Matautano Cristo naca exana xua watanacuichinexa Nacom, bapon piamonaexae

tatsichi. Nacom naca yantomata xua Jesucristo naca tsitupa naetotha wanaca capanenebiyaenexa abe waexanae cuiru coyenein weya. ³¹Daxota Nacom Pejume Diwesitha paeba jeye: “Jiwi jopa bewa pia coutha atsaquiya nayabara paebi xua peainya cui jiwixae. Bũ jame moya barapo jiwi bewa saya atsaquiya yabara paebina po coyene Nacom pia peainya cui coyenewa tatsi pon jiwi Pecanamataxeinaeinchi”, jei Nacom Pejume Diwesitha.

Meje xua Cristo petupaewa diwesi yabara

2 ¹Tamonae pam, paxam pomonae irũ painya nejume cowũntsiwixae Jesucristo. Patopan painya xantha tapaca catsipaebinxatsi Nacom pia pexainyei diwesi jume. Bapoxonae jopa paca tsipaebichi po diwesi ayapube xua tacueicueijiwa xua poxonae icha ichi xua paeba pon peyaputaein bichocono. ²Poxonae poponan painya xantha, saya meisa Jesucristo yabara nanta xeinan xua tapaca catsipaebinxatsi. Matautano yabara tapaca catsipaebinxatsi po coyene poxonae bapon naetotha tupa. ³Poxonae paxamtha naitutan nayabara nanta xeinan xua neita coxana xua beta tacueicueijiwa. Matautano tajunuwi unthũthũ deideijan. ⁴Poxonae paca tsipaebatsi Nacom Pejume Diwesi jopa paca tsipaebichi po jumein ayapube xua icha ichi poxonae cueicueiji pon bichocono peyaputaein. Ichitha seicaya nama paca tsipaebatsi tana neitorobixae Nacom pia Pejumope tũnaxũ tatsi yawano Nacom pia peyapusũ itorobi coyenewathano. ⁵Daxota poxonae pajume cowũntame Jesucristo apara poxoru jopa painya nejume cowũntsixae jiwi pia peyaputae coyenewa. Apara jame poxoru Nacom painya nepaca yawenaexae pia peyapusũ itorobi coyenewatha daxota pajume cowũntame.

Meje yabara xua Nacom naca yaputane exana pia Pejumope tũnaxũtha tatsi

⁶Paxan pacueicueijan pomonaetha pomonae bichocono pejume cowũntsiwi Nacomtha xua Nacom pia peyaputae coyenewa tatsi. Nacom pia peyaputae coyenewa tatsi jopa apara barapo cae pin nacuathe weya ponaeyo. Matautano jopa apara barapo coyene xua po coyene jopa ponaeyo pomonae piamonae itorobiya pecanamataxeinaewi weya. Pomonae anoxuae piamonae itorobiya pecanamataxeinaewi werapaena, yawano weraweracaena pia peyaputae coyenewan tatsi. ⁷Po coyene xua paca tsipaebatsi apara Nacom pia peyaputae coyenewa tatsi. Barapo coyene caena bayatha Nacom namicha yawũn xeina xua jiwi jopa yabara yaputaeyo beya anoxuae Nacom najume tsita itapeinya xeina. Caena bayatha pewũnaeya poxonae Nacom nacua forotsina bapon nanta xeina xua naca capanepaena. Baxua apara Nacom pia peyaputae coyenewa tatsi xua matapainya naituta. ⁸Barapomonae pomonae piamonae itorobiya pecanamataxeinaewi jopa yabara yaputaeyo Nacom pia peyaputae

coyewewa tatsi. Icha metha barapomonae yaputaetsipa metha jopa Jesucristo naetotha tupa exanaetsipaetsi, pon jiwi Pecanamataxeinaein, pon pexeinya peitupanae coicha pexeinaein. ⁹Nacom Pejume Diwesitha baxua yabara jeye:

“Nacom bayatha jiwi tsiwunaeta po jiwi peantobewixaetsi pocotsiwan xua bichocono pewunaewan xua exana barapo jiwi nexa. Barapocotsiwan jiwi jopa yabara yaputaeyo, matautano jopa yabara jume taeyo. Matautano Nacom tsiwunaeta pocotsiwa xua jiwi jopa bapana yabara nanta xeinae jopa juniya pewunaexae”, jei Nacom Pejume Diwesitha.

¹⁰Nacom yabara naca yaputane exana baxuan pia Pejumope tñaxutha tatsi. Nacom pia Pejumope tñaxu tatsi daxita yaputaeya necota pocotsiwa naca yaputane exana, beya yawa muxunano naca yaputane exana pocotsiwa Nacom namicha yawun xeina.

¹¹Jiton dapon aibi pon itacupatsi xua yaputane ichun pia pejuntu coyene tatsi. Saya jame meisa ichun itacupatsi xua pia coutha najuntu coyene yaputane. Bara juta ichi meisa Nacom pia Pejumope tñaxu tatsi yaputane xua Nacom pia pejuntu coyewewa tatsi. ¹²Nacom jopa naca copatsiyo xua bara wacoutha wayaputaewa tsane xua be pocotsi coyene Nacom pia penanta xeinaewa tsane. Apara jame seicaya naca cata pia Pejumope tñaxu tatsi, wanaca yaputane exanaenexa xua pocotsiwan yabara Nacom wanaca catsiwa wanaca antobexae. ¹³Waxainchi diwesi cueicueijeichi pomonaetha pomonae Nacom pejume cowuntsiwi po coyenetha Nacom pia Pejumope tñaxu tatsi naca yaputane exana. Jopa apara barapo diwesin cueicueijeichi xua saya barapo cae pin nacuathepiwi pia coyenetha tatsi xua saya ba wacoutha wananta xeinaewa. Daxota yabara paebatsi pocotsiwan xua Nacom pia Pejumope tñaxu tatsi ichichipa paeba pomonaetha pomonae Jesús pejume cowuntsiwichixaetsi. Barapomonae yaputane barapocotsiwan.

¹⁴Nama pon jopa pejume cowuntsin Jesús jopa yaputaeyo pocotsiwan wacueicueijeia, pocotsiwan Nacom pia Pejumope tñaxu tatsi naca yaputane exana. Tsipei bapon tsita penamitacueinchi jumetsi. Bapon jopa yaputaeyo barapo diwesin tsipei jopa xeinaeyo Nacom pia Pejumope tñaxu tatsi xua peyawenaenexatsi xua peyaputaewanexa. ¹⁵Jame pon pejume cowuntsin Nacom, bapon yawenatsi Nacom pia Pejumope tñaxu tatsi xua yabara peyaputaewa daxitan. Ichamonae jopa itacupaetsi xua bapon peyabara paebiwatsi xua penatsicuentiwa xua abe peexanaexae. ¹⁶Nacom Pejume Diwesitha barapo coyene yabara jeye: “¿Jintam yaputane Nacom pia penanta xeinaewa tatsi xua pecuidubinexa tsane

Nacomtha pon jiwi Pecanamataxeinaein? Jume apara, apara dapon aibi”, jei Nacom Pejume Diwesitha. Waxainchi nanta xeinatsi icha be pocotsi coyeneya Cristo ichi xua penanta xeinaewa.

Meje xua Pablo yabara paeba pomonae penabarũ nacuichiwi Nacom nexa

3 ¹Tamonae pam, paxam pomonae irũ painya nejume cowũntsiwixae Jesucristo. Jopa neitacũpaeyo xua tapaca catsipaebiwa tsainchi icha bichocono pajume cowũntame Nacomtha icha be pocotsi jiwimonae ichi pomonae bichocono jume cowũnta Nacom. Ichitha daxota paca tsipaebatsi tsipei paxam be barapocotsi jiwimonae pam pomonae jopa bichocono Nacom yabara yaputaetsi. Paxam paca tsipaebatsi be pexui pam xua aena pajume cowũntame Cristo. ²Pocotsi coyene xua ayapube jopa paca cuidubichi, icha be coxiwa ichi xua poxonae apata mito pexuyo poxonae cataunxuae jopa yaputaeyo xua xane pexaewa. Cataunxuae jopa neitacũpaeyo xua tapaca cuidubinexatsi po diwesi bichocono daunwei poxoru awiya jopa payaputaem. Paxam be barapocotsi pexui pam xua po pexui cataunxuae jopa itacũpaetsi xua pewito pexaewa.

³Paxam cataunxuae painompame icha be ichi poxonae jinompa pomonae jopa pejume cowũntsiwi Nacom. Poxonae paxam nantiya pana nauwa dubenanaebiyame, yawa nantiya pana naba dubenanaebiyame, painompame icha be ichi xua jinompa xuano abe exana dubenanaebiya pomonae jopa pejume cowũntsiwi Nacom. ⁴Ichamonae pomonae paxam jiwana pam, jeye: “Pablo yabara jume cowũntan pocotsiwa cuiduba”, jei. Ichũn jeye: “Apolos yabara jume cowũntan pocotsiwa cuiduba”, jei. Poxonae papaebame baxua bapoxonae bara pajinompame icha jiwi ichi poxonae jinompa pomonae jopa pejume cowũntsiwi Nacom.

⁵Daxota paca tsipaebatsi: Xan Pablo jopa taainya cui jiton, barichiru Apolos. Apara paxanbe saya ponbe amanaya pata tanacuichinbe Nacom. Nacom Apolos pana neitorobabe xua pata cueicueijeinexabe Nacom Pejume Diwesi. Apolos baxua pata exanaexaebe daxota pajume cowũntame Jesucristo pon jiwi Pecanamataxeinaein. ⁶Xan Pablon paca cuidubatsi Nacom Pejume Diwesi. Apolos xuya equeicha ichawa paca cuiduba Nacom yabara. Ichitha nama Nacom apara bapon, pon paca yawena xua painya nejume cocowũntaponaenexa. Barapo coyene icha be nae ichi xua peũbi nae. Ichũn ũbanota. Ichũn mera mata epababapona. Ichitha nama Nacom, apara bapon, pon exana xua xaniwaicha xuwa.

⁷Ichũn copiya ũba irũ ichũn xuya mata epababaponaexae meratha, bapon jopa ainya cui jitonyo. Jame saya meisa Nacom ainya cui, tsipei Nacom daxita xuwa exana naewan. Daxota Nacom bichocono ainya cui beyacaincha xua barapo pebinbe. Barichi Apolos irũ xan Pablon jopa ainya cui jitonyo panbe. Jame Nacom bichocono ainya cui beyacaincha

paxanbe. ⁸Pomonae xua ũba irũ pomonae xuya meratha mata epababapona barapomonae Nacom tsita najũpatsi. Nacom pentoma cata barapomonaetha be pocotsi coyeneya xua barapomonae petanacuichiwa. Pon xua abeya petanacuichixae, be conotha matoma catsinchi. Pon xua wũnaeya petanacuichixae, wũnaeya matoma catsinchi. ⁹Paxan pana nabaru yawa tanacuitan Nacom xua pata cueicueijejewa Nacom Pejume Diwesi poxonae paca cuidubatsi xua painya nejume cowũntsiwa tsane Nacom. Barapocotsi jũta coyeneya paexanan poxonae Nacom Pejume Diwesi paca cuidubatsi icha pebin ichi poxonae ũba pabitha xua petanaforotsinexatsi pexaewa. Nacom paca exana xua beta painya nejume cocowũntaponaewa bapon xua beya bichocono painya nejũntũ coyene xanepanaewa tsane. Baxua Nacom paca cana exana, icha be pocotsi jũta coyeneya ichi poxonae pebin bomũxũ acabapona xua beya poxonae bichocono pexeinya bo. ¹⁰Nacom necopata xua ponxaein copiya matha tapaca cayawenaewatsi xua painya nejume cowũntsinexa bapon. Nama bapoxonae xuya ichamonae paca cuidubapona Nacom Pejume Diwesi xua painya nejume cocowũntaponaenexa. Barapocotsi jũta coyeneya exanan poxonae tapaca cayawenaewatsi, icha pebin ichi pon peyaputaein xua bo peacabiwa poxonae bo acaba po bo ibo bo. Bapon copiya matha tsicobe nobabareca po iboton beta petabũ caumenaewa xua ichamonae tsicobe nobabarecatsi. Athawetsica xuya ichamonae exanapona. Daxita pomonae acaba barapo ibo bo bewa beta xanepanaya exanaena icha jiwi ichi xua poxonae bewa beta taexanaena xua pocotsiwa taexana Nacom nexa. ¹¹Poxonae jiton ibo bo acaba bapon copiya beta noba po iboton xua copiya nanta caumena. Bapoxonae ichũn bewa icha iboton beta cuaranobi barapo iboton pecoyoreca xua bo pexeinya bo petsuncuaenexa. Barapocotsi jũta coyeneya ichi, poxonae paca cuidubatsi Jesucristo pejume diwesi. Ichũn bewa beta yabara paca cuidubina icha coyene xua baxua painya nejume cowũntsinexa. ¹²Po pebin ibo bo acaba barapo pebin itacũpatsi xua jebabapona ichawa barapo ibotontha, po ibotontha copiya nanta caumena. Pocotsiwan bapon itacũpatsi xua jebabapona bichocono ayapusũ be pocotsiwa pewũn oro nain, yawano pocotsiwa xua pewũn plata nain yawa pocotsiwa be iboton po iboton xua bichocono ainya matoma. Ichacuitha barapo pebin itacũpatsi xua barapo ibotontha jebabapona pocotsiwan xua pepawi be naepawa, yawa be naepanaewan yawa be musuriboton. Bara jũta ichi, pebin itacũpatsi xua yawanaena ichamonaetha. Ichacuitha beta cuidubina pomonae xua jume cowũnta Jesucristotha pocotsiwa xua bichocono ayapusũ. Ichacuitha cuidubina pocotsiwa xua pepawi pomonae xua jume cowũnta Jesucristotha xua jopa ayapusũyo. ¹³Jopaena matacabi po mataqueitha Nacom yabara paebina jiwi xua penatsicuentisiwa xua abe peexanaexae. Barapo mataqueitha Nacom taena po coyene xua jiwi taexana Nacom.

Nacom bichocono tsita xanepanatsi pocotsiwa xua bichocono ayapusu po coyenein jiwi taexana bapon nexa. Ichitha nama Nacom naitemata po coyene jopa tsita xanepanaetsi xua pocotsiwa bequein jiwi taexana bapon nexa. ¹⁴Ichha pebin exana pocotsiwa xua bichocono ayapusu xua Nacom nexa, Nacom matoma catsina bapontha. ¹⁵Ichitha icha ichun taexana Nacom pocotsiwa Nacom jopa tsita xanepanaetsi, daxita barapo coyenein Nacom naitemata po coyene bequein bapon Nacom taexanatsi. Ichitha bapon capanepatsi poxonae Nacom naitemata po coyene bapon exana, icha pebin ichichi xua capanepatsi isoto weya bequein daxita tataxotsi xua pocotsiwa xeina.

¹⁶Barapara paxam payaputaneme xua painya juntu coyene Nacom tsitatsi xua bara be Nacom pin pia bo tatsi tsipei Nacom pia Pejumope tunaxu tatsi popona painya juntu coyenetha. ¹⁷Ichha ichun saraboba Nacom pin pia bo, Nacom xuya weraweraca exanaena barapo jitontha. Nacom pin pia bo tatsi, bara po bo Nacom tsita xanepanatsi poxoru pia Pejumope tunaxu tatsi pepoponaexae barapo botha. Ichha Nacom ichi xua weraweraca cana exana pontha pon petasarabobixaetsi pin pia bo tatsi, barichi xuya Nacom weraweraca cana exanaena pontha pon paca juntu coyene itoroba xua abe painya neexanaewa tsane. Nacom baxua exana tsipei Nacom pia Pejumope tunaxu tatsi popona painya juntu coyenetha.

¹⁸Jopa pacopatsinde xua painya coutha pana namuxuitorobame. Ichha ichun pia coutha nacayabara nanta xeina xua bichocono peyaputaein icha barapo cae pin nacuathepiwi ichi, bewa bapon pia coutha equeicha caewa naexanae be pocotsin jopa peyaputaein. Bapoxonae bapon bara Nacom tsita be pon pepa peyaputaeinchi. ¹⁹Nacom tsita penamitacueinchi jumetsi po peyaputae coyenewan yaputane jiwi pomonae barapo cae pin nacuathe jinompa. Nacom Pejume Diwesitha barapo jiwi yabara jeichi: “Nacom tsitatsi xua apara xeina penatsicuentsiwa xua abe peexanaexae pocotsi jiton peyaputaein, peexanaexae barompaya pia peyaputae coyenewatha”, jei Nacom Pejume Diwesitha. ²⁰Matautano Nacom Pejume Diwesitha baxua yabara jeino: “Nacom yaputane po coyenein nanta xeina pomonae peyaputaewi. Barapocotsi coyenein Nacom tsita penamitacueinchi jumetsi”, jei Nacom Pejume Diwesitha. ²¹Pomonae pejume cowuntsiwi Jesucristo jopa bewa atsaquiya pana neyabara paebi tsane xua pejeiwa: “Pon jume cowuntan pocotsiwa cuiduba bapon bichocono peyaputaein beyacaincha ichun pon peyaputaein”, xua pata taneyabara jeiwa pomonae pejume cowuntsiwi. Tsipei paxan pomonae pecuidubiwi pan saya pebiwi pan xua jopa bichocono peyaputaewi pan. Dapocotsiwa aibi xua pocotsiwa payaweraweracame xua jopa paxeinaem. Daxita pomonae painya nepaca cuidubiwi, iruno daxita coyenein pocotsiwa Nacom forota, bara Nacom exana paxam nexa painya nepaca cayawenaewa tsane. ²²Xan Pablon Nacom neitoroba, iru Apolos

itorobatsi, iru Pedro itorobatsi xua pata paca cayawenaenexatsi. Nacom paca cata daxita xua barapo ira piawan, xua painya nepaca yawenaenexa. Matautano yabara paca yaputane exana xua peajuntuyarusuwa, po coyenewano petupae coyenewa, matautano po coyene anoxuae piawa yabara, po coyenewano bexa piawa yabara xua painya nepaca yawenaenexa. ²³Baraxuan daxita paxeiname Cristo piamonae jiwi tatsi pamxaem. Barichi Cristo barapara Nacom Pexanto tatsi.

Meje xua Jesucristo pia peitorobi jiwi tatsi taexana, Nacom taexanatsi

4 ¹Paxam bewa pana neyabara nanta xeinaename xua paxan meisa saya barapomonae pan xua pomonae Cristo amanaya pata tanacuichi jiwi pan. Paxan yabara pacuiduban Nacom moya pia peyawun xeinaewa tatsi po coyene copiya bequein bayatha moya yawun xeina xua jiwi jopa yabara yaputaeyo. Barapo coyene xua moya peyawun xeinaewa, anoxuae Nacom najume yabara copata xua jiwi bara peyaputaenexa. ²Pon tanacuita pia pecanamataxeinaeinchi, barapon bewa bara xaniwaicha exanaena pocotsiwa pia pecanamataxeinaeinchi tsipaeba xua bepa exanaena pinae xua daxota pejume cowuntsinexatsi pia pecanamataxeinaeinchi xua bara xaniwaicha exana. ³Jopa netsita ainya cuiyo xua paxam tapaneyabara paebiwam xua tacuidubiwa yabara xua icha metha bara exanan pocotsiwa Nacom neitoroba. Matautano jopa netsita ainya cuiyo xua jiwi taneyabara paebiwa xua barapo coyene xua icha metha bara exanan. Barichi tacoutha jopa nayabara nanta xeinaeinyo xua icha metha barapo coyene jopa exanaeinyo, xua daxota tanatsicuentisixae abe taexanaexae Nacomtha. ⁴Tajuntu coyene netsipaeba xua bara pinae xanepanaya taexanaewa. Bequein tajuntu coyene baxua netsipaeba ichitha jopa nayaputaeyo xua metha apara abe taexanaewa xua daxota Nacom tsita natsicuantan. Nacom pon jiwi Pecanamataxeinaein bapon apara pon taneyabara paebin xua tanatsicuentisiwa xua abe taexanaexae. Bapon meisa nejuntu coyene yaputane icha bara metha tsita xeinan xua tanatsicuentisiwa xua abe taexanaexae. ⁵Jopa bepijawa payabara paebinde ichamonae xua abe pia peexanaewa. Abu tsane beya poxonae patopaetsica pon jiwi Pecanamataxeinaein bapoxonae payabara paebiname abe pia peexanaewa. Barapon Nacom tsita itutsina po coyene xua jiwi pia pejuntu coyenewatha namicha xeina po coyene xua ichamonae jopa taeyo. Bapon Nacom pon jiwi Pecanamataxeinaein itutsina po coyenein jiwi namicha xeina pejuntu coyeneintha xua penatsicuentisiwan po coyenein xua Nacom petsita exanaewatsi. Daxita barompaya jiwitha Nacom yabara paebina po coyene pia petaexanaewichi. Pontha pon xanepanaya petanacuitsinchi Nacom wunae jainchina bapontha. Nacom jopa wunae jainti tsane pon jopa xanepanaya petanacuitinchi.

⁶Tamonae pam, paxam pomonae iru painya nejume cowuntsiwixae Jesucristo. Yabara paca tsipaebatsi barapo coyenein po coyenein paexanan, xanepanaya painya nejinompaenexa. Barichi paca tsipaebatsi Apolos yabara iru xua xan yabara painya nenacuidubinexam pocotsiwa paexanan. Bapoxonae painya neexanaewa tsane icha paichin poxonae xua paexanan. Pajinompa dubenanaebiyama icha be pocotsi coyeneya Nacom Pejume Diwesitha paeba. Jopa painya neexana dubenanaebiyaenexa pocotsiwa jopa paebiyu Nacom Pejume Diwesitha. Painya xoba atsaquiya pacayabara nanta xeiname ponbe Nacom petanacuichinchibe, xua ichun bichocono peainya cui jiton beyacaincha ichun. ⁷Nacom jopa paca exanaeyo xua peainya cui jiwi pam beyacaincha xua ichamonae pomonae iru pejume cowuntsiwi Nacom. Pocotsiwa paxeiname jopa apara pana nacatsim painya coutha barapocotsiwa. Apara jame daxita baxuan paxeiname pocotsiwa Nacom paca catsiba. Daxota jopa bewa atsaquiya pana nayabara paebim painya coutha. Poxonae baxua papaebame apara pajuntemainame pocotsiwa xua Nacom painya nepaca catsibiwa daxita.

⁸Itara mexeya daxita painya nexeiinae jiwi pam po coyenein xua paichichipame painya neyaputaewa Nacom yabara daichitha jopa barapomonae pam. Pananta xeiname icha pomonae copei pexeinaewi ichi iru icha ichi pomonae jiwi itorobiya pia pepa peewatsiwichi xua xeina daxita xua ichichipa yawa daxita xua xuan pocotsiwa pecanantawenonaewa. Paxan jopa nama bara paichinyo. Maisa anoxuae bequein pana ita cui jicha xua yatsicaewa paxam pomonae painya neyaputae jiwi pam daxita xua Nacom Pejume Diwesi yabara xua bapoxonae pata tana nebaru yaputaewam tsane daxita Nacom Pejume Diwesi. ⁹Paxan Jesucristo pia peitorobi jiwi tatsi pan. Xan nanta xeinan xua Nacom bara be copata pata tana cana exanaewa xua jiwi pata tana necui caponaewa xua poxoru imoxoyo pata werapaewa tsane. Paxan be pocotsi jiwimonae pecui pawu jiwimonae pan xua daxota daxita nacuanpiwi iru matatsunpiwi pana ichichi xeica. ¹⁰Jiwi pana neyabara nanta xeina xua paxan pata nemuxuxenae jiwi pan, yaitama paxan Cristo payabara cueicueijan. Jaina maisa paxam jiwi paca yabara nanta xeina xua paxam beta yabara painya neyaputae jiwi pam Cristo. Paxan nama jopa pana daichibenaeyo. Paxan jiwi pana yabara nanta xeina xua pajuntu coyene faefaenabenan. Jaina nama pana nayabara nanta xeiname xua pajuntu coyene daunwam Nacomtha. Jaina maisa jiwi paca baru cui itura jina, jopa pana daichibenaeyo. Nama atsaquiya abeya pana yabara paeba. ¹¹Caena bayatha beya anoxuae, paxan bichocono pajainpan. Matautano pameratsipanno bichocono. Matautano painta paparuwan bichocono jonopa. Jiwi pana neba bichocono. Yawano jopa bo paxeinaeyo. ¹²Pana nacobe fifinatontan, patain pata nacuichixae bichocono. Bequein jiwi tsumu jumetha pana casebeiba daichitha barapomonae Nacomtha

patawꞑueiban xua barapomonae peyawenaenexa tsaibi tsainchi. Poxonae jiwi pana atene exaneiba bara saya pacui copatan. ¹³Bara bequein jiwi abeya pana neyabara paebeiba ichamonaetha, daichitha baxua jopa pajume naitaewatsinyo. Saya jame xanepanaya patsipaeban barapomonaetha. Jiwi pana neyabara nanta xeina xua pinae peabe jiwi pan. Barapo jiwi pana itaweta icha be poxonae jiton ichi poxonae piawa basuratha xuba. Baxua jiwi painta exanapona beya anoxuae.

¹⁴Jopa baxua pacata tinaetsi xua paca aura exanatsi. Jame pacata tinatsi xua pata cayawenaenexatsi xua painya neexanaenexa pocotsiwa bewa paexanaename. Paxam be tapexui pam, tsipei bichocono paca antobetsi. ¹⁵Bequein icha bara metha paxeinaetsipame diez mil poyobe pomonae painya cacuidubi jiwi po coyene xua Cristo yabara, ichitha saya pacata compa pon be painya axa natsicotane. Saya meisa xan compan copiyan pon be painya axa tapacata natsicotaeinchi, tsipei paxam copiya Cristo Jesús pajume cowuntame poxonae paca cuidubatsi Nacom Pejume Diwesi. ¹⁶Daxota bichocono paca muxu jeichi, paexanaponde icha xan ichin xua exanaponan.

¹⁷Daxota pacata itorobatsi Timoteo pon bichocono antobein. Bapon bara be taxanto, tsipei yawenan xua pejume cowuntsiwa Jesucristo pon jiwi Pecanamataxeinaein. Bapon exaneiba pocotsiwa itorobeiban. Bapon Timoteo paca tsipaebina xua tana neyabara paebiwa tsane po coyene xua xanepanaya tapoponaewa tajume cowuntsixae Cristo Jesús. Barapo coyenein cuidubeiban ichaxota poneiban daxita i dapocotsi penacacetutsi bon jiwitha pomonae Nacom pejume cowuntsiwichi. ¹⁸Ichamonae pomonae paxam jiwana pam, bichocono juntꞑ coyene yꞑcatsi xua ichamonae paebiwatsi. Baxua exana tsipei barapomonae nanta xeina xua xan jopa tapaca siwa ponaewa tsainchi. ¹⁹Icha Nacom pon jiwi Pecanamataxeinaein copatsina xua bara taponaeewa tsane aunxuae paca siwa ponaeinchi. Bapoxonae taein pomonae xua ichamonae paebiwichi icha metha barapomonae xeina Nacom pia peayapusꞑ itorobi coyenewa tatsi. Ichacuihitha metha tsipae apara metha saya paebe. ²⁰Jiwi jopa patsi tsane Nacom pia peitorobi nacua beicha xua poxoru wꞑnae pepaebixae tsane pia coutha. Apra jame jiwi patsina bara beicha pexeinaexae Nacom pia peayapusꞑ itorobi coyenewa tatsi. ²¹¿Eta xua painyatsi? ¿Paca tsicapatinchi naewan xua xota paca beinchi? Jume apra. Ichacuihitha metha tsipae ¿paichichipame xua tapaca casiwa ponaewatsi tapaca caantobexaetsi? ¿Matautano beta pacata exanaeinchi xua jopa taanaepanaexae? Aa jame baxua.

Meje xua poxonae Pablo itaweta pon penowa tsiperꞑ nacoyoba

5 ¹Ichꞑn netsipaeba xua pinae caein pon paxam jiwana pam pinae bichocono abe exana. Pinae bapon penowa tsiperꞑ nacoyoba powa

paxa tatsi bayatha barũ popona. Barapo peexanae coyenewa bichocono abe. Pomonae bequein jopa peyabara yaputaewa Nacom barapo coyene jopa copatsiyo xua jiwi peexanaewa tsane baxua. ²Paxam pomonae painya nenanta xeinae jiwi pam xua peainya cui jiwi pam xua daxota jopa panantawenonaem xua painya neitawetsiwa bapon. Jame bewa baxua payabara jũntũ coyene wecoyam. Pon painya xantha pita penowa powa paxa tatsi xeina bewa patorotsim painya xainya weya. ³Bequein jopa yatsicaewa paca barũ ecaetsi ichitha paca yabara nanta xeineibatsi be poxonae paca barũ ecatsi yatsicaewa. Bara bapon yabara paeban xua penatsicuentiwa xua abe peexanaexae tsipei yabara paeban Jesucristo pia peayapusũ itorobi coyenewatha tatsi, pon Wanacanamataxeinaein. Baxua exanan icha be poxonae yatsicaewa tapaca barũ ecaewatsi.

⁴Poxonae panacaetutame daxita pam, pomonae painya nejume cowũntsi jiwi Jesús, paca yabara nanta xeineibinchi icha be poxonae tapaca barũ ecaewatsi yatsicaewa. Matautano Jesús pon jiwi Pecanamataxeinaein pia peitorobiwa tatsi xua peayapusũwa tatsi paxeina dubenanaebiyama.

⁵Pon xua awiya abe exanapona barapo jiton bara pacopare Satanastha pon caurimonae pia pentacaponaeintha tatsi. Bapoxonae barapo caurimonae pia pentacaponaein tatsi atene cana exanaena bapontha xua saya pia pepontha tatsi poxoru barapo jiton ichichipa xua abe peexanaewa. Bapoxonae barapo pebin equeicha jume cowũntsina Nacom po pebin copiya abe peexanaexae. Pia pejumope tũnaxũ tatsi Nacom capanepaena po mataqueitha poxonae Jesús patopeicaena, pon jiwi Pecanamataxeinaein.

⁶Paxam jopa bewa atsaquiya pajinompaem xua poxoru pocotsiwa painya neexana dubenanaebiyaexae. Icha caein payabara cui copatame xua bara abe exanapona painya xantha pon abe peexanaein bequein xua saya conotha exana, bapoxonae pinmonae painyamonae abe exanapona. Bara paxam payaputaneme pocotsi diwesiyo ba jiwi yabara canaũta jũtsiya paeba baxua yabara xua pejeiwa: “Levadura matawũn xoyo bequein peyauyo baxoyo daxita pantha cotowa exana”, xua pejeiwa.

⁷Painya xainya weya patorore pon abe peexanaein abe peexanaeyainwa daxita painyamonae xua icha bapon ichi xua abe exana. Barapo coyene icha be ichi poxonae jiwi levadura bebai, po levadura peru levadura abe peexanaeyainwa pan matabũtha. Poxonae bapo pebin patorotame bapoxonae painyamonae pomonae pejume cowũntsiwi xanepanaya jinompaena. Caena bayatha judiomonae juteba oveja xua poxonae pewũnaeya tsane poxonae Egipto nacua weya pona. Bapoxonae Nacom yabara jũntemaina judiomonae abe pia peexanae cuiru coyenein tatsi poxonae cordero bexotsi xua oveja pebto penũn. Nacom tsitatsi xua Cristo bara be cordero poxonae tũpa naetotha. Cristo naca tsitũpa xua abe waexanae cuiru coyenein icha cordero ichi xua tsitũpa xua judiomonae

abe pia peexanae cuiru coyenein tatsi. ⁸Waxainchi jopa bewa peabe coyenewa exanaetsi. Jame bewa xaniwaicha jũntũ coyene xanepanaya jinompa dubenanaebiyaetsi Jesucristo pia pejume cowũntsiwichixaetsi.

⁹Icha cartatha paca tsipaebatsi xua jopa bewa painyamonaе jiwi pacana exanaem pomonaе pesi cui weiweinae jiwi xua bequein jopa piseuri jiwi. ¹⁰Barapomonaе pomonaе pesi cui weiweinae jiwi pomonaе jopa pejume cowũntsiwi Jesús apara jopa paca tsipaebichi barapomonaе yabara. Pomonaе jimũn jiwi xua ichichipa copei xeinaewi naexana xua beyacaincha ichamonaе pomonaе jopa pejume cowũntsiwi Jesús apara jopa paca tsipaebichi barapomonaе yabara. Pomonaе jopa pejume cowũntsiwi Jesucristo pomonaе pecaibi jiwi apara jopa paca tsipaebichi barapomonaе yabara. Pomonaе ibo nacomũn wũnae pejainchiwi apara jopa paca tsipaebichi barapomonaе yabara. Barapomonaе pexainya weya painya newarapaenexa maisa jame bewa pawarapaem barapo cae pin nacia weya, xua ichaxota po nacia jiwaibi beya xua bara beya painya newarapaenexa. ¹¹Pocotsiwa aunxuae paca tsipaebatsi baraxua icha cartatha bayatha pacata tinatsi. Jan: “Jopa bewa payawa muxuna jinompaem pomonaе abe peexanae jiwi bequein paeba xua pinae jume cowũnta Jesucristo. Barapomonaе jopa bewa payawa muxuna jinompaem pomonaе pesi cui weiweinae jiwi, irũno pomonaе jimũn jiwi xua ichichipa copei xeinaewi naexana beyacaincha xua ichamonaе irũno pomonaе ibo nacomũn wũnae pejainchiwi, irũno pomonaе nacũpa penaexanaewi, irũno pomonaе jiwi pebiataewi, irũno pomonaе pecaibi jiwi daxita barapomonaе jopa bewa pabarũ xaem bequein paca wabitha tsipaeno xua painya nenanabanaewa tsane”, jan. ¹²Xan jopa neitacũpaeyo xua jiwi tayabara paebiwa xua penatsicuentsiwa Nacomtha xua abe peexanaexae pomonaе jopa jume cowũntsiyo. ¹³Jame apara meisa Nacom yabara paeba xua penatsicuentsiwa xua abe peexanaexae pomonaе jopa Nacom pejume cowũntsiwichi. Ichitha bewa payabara paebim xua penatsicuentsiwa pomonaе penacaetutsi jiwi pomonaе pejume cowũntsiwixae xua abe peexaneibixae poxonaе. Daxota bewa paxam patorotsim pon abe exana painya xantha pon penowa tsiperũ wenacoyoba xua awiya baru jijinapona.

Meje yabara pomonaе pejume cowũntsiwi Jesucristo xua peponaewa pontha pon jiwi yabara paeba xua penatsicuentsiwa xua abe peexanaexae

6 ¹Poxonaе ichamonaе pomonaе pejume cowũntsiwi jiwana pacata abe exana painya xoba paponame ichaxota eca pon jiwi yabara paeba xua penatsicuentsiwa xua abe peexanaexae. Jamaisa baxua paexaname xua pawũcame pon jopa pejume cowũntsin pon jiwi yabara paeba xua penatsicuentsiwa xua bapon peitawetsinexa pomonaе abe peexanaewi. Bapoxonaе painya pia bapon paca tsipaebichi

xua barapomonaē paca tsita natsicuenta xua abe peexanaexae. Jame bewa paponame ichaxota nacaetuta pomonaē pejume cowũntsiwi Jesucristo. Bapoxonaē barapomonaē yabara paebina pomonaē xua penatsicuentisiwi xua abe peexanaexae paxamtha. ²Paxam payaputaneme xua pomonaē pejume cowũntsiwi Jesucristo, barapomonaē yabara paebina pomonaē xua penatsicuentisiwi xua abe peexanaexae pomonaetha pomonaē barapo nacuathepiwi. Barichi bexa tsane poxonaē Cristo patopeicaena payabara paebina pomonaē barapo nacuathepiwi xua penatsicuentisiwa xua abe peexanaexae. Daxota anoxuae bewa paexanaem xua payabara paebina xua penatsicuentisiwa xua bequein bara conotha abe peexanaexae pomonaetha pomonaē pejume cowũntsiwi Jesucristo po coyenein bara bequein bichocono jopa abeyo. ³Waxainchi yaputainchi xua bexa tsane wayabara paebiwa matatsunpiwi penatsicuentisiwa xua abe peexanaexae Nacomtha. Baxua exanaeinchi poxonaē Cristo patopeicaena. Daxota anoxuae paca itac̣pa xua painya neyabara paebiwa xua penatsicuentisiwa xua abe painya nepaca tsita exanaexae pomonaetha pomonaē pejume cowũntsiwi xua wajinompaewa yabara barapo cae pin nacuathe. ⁴Icha paxeinaeme po coyenein xua abe pacata exana pomonaē irũ pejume cowũntsiwi, jopa bewa paponame ichaxota pon jiwī peyabara paebī jiwī xua penatsicuentisiwa xua abe peexanaexae pon jopa pejume cowũntsin. ⁵Baxua paca tsipaebatsi xua painya neauramnexa tsane. Pon ba peyaputaēin bapon ba itac̣patsi xua jiwī peyabara paebiwa pomonaetha pomonaē xua penatsicuentisiwa xua abe peexanaexae, xua ichamonaetha abe peexanaexae pomonaetha pomonaē irũ pejume cowũntsiwixae Jesucristo. Ichitha poxonaē paponame ichũntha pontha pon jiwī peyabara paebī xua penatsicuentisiwa xua abe peexanaexae, pon jopa pejume cowũntsin, apara jopa xapain paexanaem. ¿Metha bara painyamonae jiwānapin dapocotsin yatsicaewa aibi jampa pon jiwī peyabara paebī xua penatsicuentisiwa xua abe peexanaexae jampa? ⁶Ponbe paxam jiwāna pam, ponbe pejume cowũntsinbe Jesucristo, baponbe nababe. Ichũn xua baponbe jiwāna pona ichaxota pon jiwī peyabara paebī pon jopa pejume cowũntsin, xua peyabara paebīnexatsi pon abe peexanaexae ichũntha. ⁷Poxonaē paxeineibame po coyenein xua pana nabeibame xua daxota paponeibame pontha pon jiwī peyabara paebī baxua abe paexaname. Poxonaē ichamonaē abe pacata exana saya bara pacui yabara copabare. Jame baxua pacata xanepana. Bapoxonaē jopa painya nenantawenonaewa xua painya neponaewa pontha pon jiwī peyabara paebī xua penatsicuentisiwa xua abe peexanaexae. Barichino poxonaē ichamonaē paca caiba saya bara pacopare xua jopa abe painya neexanaenexa tsane bapomonaetha. ⁸Payopitame xua pinae painyamonae pacata abe exana, yawa xua pinae paca caiba. Ichitha apara paxam bara paichim abe

paexaname, xua poxonae paponame pomonaetha pomonae jopa pejume cowuntsiwi xua peyabara paebinexatsi pomonae abe pacata exana.

⁹⁻¹⁰Paxam payaputaneme xua pomonae abe peexanaewi jopa patsi tsane Nacom pia peitorobi nacua beicha. Painya xoba pana nayabara cui copatame xua painya coutha painya nenamuxutorobiwa barapo coyene yabara xua daxota pananta xeiname xua barapomonae apara patsina Nacom pia nacua beicha. Pomonae jopa patsi tsane Nacom pia peitorobi nacua beya xua peexanaexae po coyenein xuaje: Pomonae pesi cui weiweinae jiwi, pomonae wūnae pejainchiwi ibo nacomūn, irū pomonae penotsiwi yabūxi powaxi bara bequein pia pebiwi xeina, irū po pebiwi cae pebiwi penaisa maichiwi, irū pomonae pecaibi jiwi, irū pomonae jimūn jiwi xua ichichipa copei xeinaewi naexana beyacaincha xua ichamonae, irūru pomonae nacūpa penaexanaewi, peatsaxa meran, irūno pomonae jiwi pebiataewi, irūno pomonae peyabara muxutorobi jiwi pecaibinexa. ¹¹Copiyatha paxam be barapocotsi jiwimonae pam xua poxonae matha aena pajume cowuntame xua abe painya neexanae jiwi pam. Daichitha Nacom paca yabara jūntemaina abe painya neexanae cuiru coyenein. Matautano Nacom paca yabara caunuta jeye: “Tapexuimonae jiwi”, paca yabara jei. Matautano Nacom jopa painya tsita natsicuentsiwa xua abe painya neexanaexae. Nacom pia Pejumope tūnaxū tatsi irū Jesucristo pacata exana baxua xua poxonae pajume cowuntame Jesucristo pon jiwi Pecanamataxeinaein.

Meje xua Pablo jei: “Wapepon Nacom piawa”, jei

¹²Jiwi ba jeye: “Xan necopata xua bara taexanaewanexa pocotsiwa xua ichichipan”, jei. Bara bequein xainyei jiwi xua pepaebiwa, ichitha ichacuitha barapo jiwi jopa xapain pia coutha nata exanaetsipae. Bequein barichin bequein necopata xua bara daxita taexanaewa, daichitha ichacuitha jopa xapain nata exanaeinchipae xua poxonae icha nanta xeinaetsipan xua jopa neitacūpaeyo xua bara tana necui copatsiwa. ¹³Bara jiwi ba xainyeya paeba poxonae jeye: “Pexaewa wūnae xua pecotsoro nexa, irū pecotsoro wūnae xua pexaewa nexa”, jei. Ichitha bexa tsane Nacom weraweraca cana exanaena barapo naxobe jumebe. Nacom apara jopa nacata exanaeyo wapepon xua wapepon abe wanata exanaewa xua wanasi cui taetaewa. Wapepon Nacom exana xua pia coutha natsiexana, xua watanacuichinexa bapon, pon jiwi Pecanamataxeinaein. Nacom yawena xua wapepon yawenatsi xua pia wanaca capanepaenexa. ¹⁴Icha Nacom ichi xua asū exana petūpae cuiru coyene weya pon jiwi Pecanamataxeinaein Jesucristo, Nacom bara naca ichi tsane, asū naca exanaena petūpae cuiru coyene weya pia peayapusū itorobi coyeneyatha. ¹⁵Paxam Corinto tomarapiwi pam. Payaputaneme xua daxita carepaya paxam Cristo piamonae jiwana tatsi pam, pomonae pejūntū coyene

xanepanae jiwi. Xan iru barapo pejuntu coyene xanepanae jiwi piamonae jiwanan tatsin. Daxota jopa benatsiperu jayababinyo powaxitha powaxi pesi cui weiweinaewaxi, tsipei tapepon apara Cristo tatanacuichinexa bapon. ¹⁶Paxam payaputaneme icha pebin natsiperu jayababa powatha powa penasi cui matacaetsiwa baraponbe bara be caeinbe naexanabe. Nacom Pejume Diwesitha jeye: “Poxonae pebin piowa pita bara be caein naexanabe”, jei Nacom Pejume Diwesitha. ¹⁷Poxonae ichun cae juntu coyene naexana Cristotha pon jiwi Pecanamataxeinaein, bapon bara apara caein naexana Cristotha pia pejuntu coyenewatha.

¹⁸Painya xoba paexanaename icha pocotsi coyeneya ichi xua peexanaewa pomonae pesi cui weiweinaewi. Daxita po coyenein pebiwi exana xua abe peexanaewa apara jopa pia coutha abe nacana exanaeyo. Apara jame ichuntha abe exana. Saya jame poxonae pebiwi pesi cui weiweinaewi bapoxonae barapo pebiwi pia coutha abe nacana exana. ¹⁹Paxam payaputaneme xua Nacom pia Pejumope tunaxu tatsi paca baru jinompa pia paca nacana jumope tunaxu catsixae paxamtha. Icha barapo Nacom pia Pejumope tunaxu tatsi ichi xua paca baru jinompa, barichi barapo Nacom pia Pejumope tunaxu tatsi popona Nacom pin pia botha tatsi. Tsipei anoxuae Nacom piamonaexae tatsi pam, apara paxam jopa painya coutha painya nenacanamataxeinaewi jiwi pam. ²⁰Nacom bayatha pacata pematomatsiwa exana xua poxonae Jesús naetotha painya nepaca tsitupaewa xua abe painya neexana cuiru coyenein. Daxota beta pajume cowuntsiya jinompare ichamonae petitatha tatsi. Bapoxonae barapomonae Nacom baru cui itura jinatsi xua pon xanepanaya peexanaein poxonae paca cui tane xua xanepanaya pajinompame.

Meje xua Pablo yabara muxuweta xua jitha peenaewa yabara

7 ¹Anoxuae paca jume notatsi po peyainyabiwa pana yainyabame cartatha. Icha pebin jopa jitha beecaeyo bu bara moya jopa jitha ecae tsane, bequein bara baxua taxanepanatsi bapon. ²Ichacuiitha poxonae pebin jopa jitha ecaeyo besi cui weiweinaena powatha xua bequein pia pebin xeina. Daxota pecuiyainwa barapo coyene bapon bewa jitha ecaena, xua barompaya piowa tatsi. Barichi daxita yabuxi bewa barompaya seicaya notsina pia pebiwi. ³Pebin bewa bara exanaena piowatha xua poxonae peisa maitecae coyenewa. Barichiru yabuyo bewa bara exanaena pia pebintha xua poxonae petsicuara maitecae coyenewa. ⁴Petsiriwa powa jitha eca, jopa bewa nayabara nanta xeinae xua penaperu xeinaewa xua saya pia coutha nexa. Jame bewa nanta xeinae xua apara bara pia pebin tatsi pia peruto tatsiru. Barichi pebin jopa bewa nayabara nanta xeinae xua penaperu xeinaewa xua saya pia coutha nexa. Jame bewa nanta xeinae xua apara bara piowa tatsi pia peruto tatsiru. ⁵Petsiriwa jopa bewa aichaxaibi tsane xua isa maiteca pia pebin. Pebin

irũ jopa bewa aichaxaibi tsane xua piowa peisa maitecaewatsi. Poxonae pebin piowabe eenatsibe caentacabiyobetha xua Nacomtha wũcauyabe bapoxonae baponbe itacũpatsi xua itompa exanaenabe xua peexanaewa po coyene penaisa maitecae cui coyenewa. Saya caentacabiyobetha baxua bewa itompa exanaena po coyene xua penaisa maitecae cui coyenewa. Jame poxonae po mataqueitha najume wetsina xua Nacomtha pewũcaewabe bapoxonae jame bara bewa exanaenabe equeicha penaisa maitecae cui coyenewa. Baxua bewa exanaenabe xua jopa pejũntũ coyene jũjũtsinexa tsainchibe caurimonae pia pentacaponaein tatsi xua abe peexanaenexa tsanebe xua naitompa penaexanaexaebe.

⁶Saya baxua paca muxuwetatsi apara xua jitha painya neenaewa xua daxota jopa abe painya neexanaewa tsane. Jopa apara paca itorobichi daxita pam xua jitha painya neenaewa. Bara moya jitha ecaena pon ichichipa. ⁷Ichichipan xua daxita jiwi jinompa dubenanaebiyaena icha po coyeneya ichin xua poxonae poponan xua jeinya ecan. Daichitha Nacom cata daxita jiwitha xua daxita jiwi barompaya pia cui coyenewan xexeina tsiniya. Po coyenein xua Nacom cata daxita barompaya jiwitha jopa nacui coyene jũpaeyo.

⁸Pomonae pemisa dubenaewi pam irũ powaxi painya seuriwi painya necacuenta werapaewaxichi pam, daxita barapomonae pam paca tsipaebatsi. Bara wũnae tsipae icha jopa jitha paenaemtsipae icha be xan ichin xua jopa jitha taecaewa. ⁹Ichitha icha jopa paca itacũpaeyo xua painya nejeinya enaewa moya bara jitha bewa paenaem. Jame baxua pacata xanepana xua jitha paename xua daxota jopa painya nesi cui weiweinaewa.

¹⁰Ichitha pomonae xua bayatha jitha painya neenaewi pam barapomonae pam paca itorobatsi. Jopa apara taitorobi coyeneya paca tsipaebichi. Jame apara Nacom taneitorobixae xua po coyeneya tapaca catsipaebinxatsi. Paca jeichi: “Yabũyo jopa bewa cuenta warapaena pia pebin xua pexubinexa”, paca jeichi. ¹¹Powa punaxuba pia pebin, barapowa bara misa ecaena. Jopa pitsi tsane icha pebin equeicha. Metha jame xanepanaetsipa icha bapowa caewa pichapa pia pebin. Barichi pebin jopa bewa punaxubi tsane piowa.

¹²Anoxuae nama icha coyene paca tsipaebatsi po coyenewa jopa Nacom neitorobiyo saya xua tacoutha tananta xeinaewa. Icha pebin pon pejume cowũntsin xeina piseuri powa jopa pejume cowũntsiwayo bapon jopa bewa punaxubi tsane bapowa icha bapowa ichichipa xua bapon pebaru poponaewatsi. ¹³Barichi icha yabũyo powa jume cowũnta xeina pebin pon jopa pejume cowũntsin bapowa jopa bewa punaxubi tsane icha bapon ichichipa xua bapowa pebaru poponaewatsi. ¹⁴Po pebin bequein jopa jume cowũntsiyo, Nacom tsitatsi xua po coyene barapon penacoyobiwa bara xanepana, tsipei bapon piowa xeina powa pejume

cowuntsiwayo. Barichi powa jopa bequein pejume cowuntsiwayo, Nacom tsitatsi xua po coyene barapowa jitha peecaewa bara xanepana, tsipei bapowa xeina pia pebin pon pejume cowuntsin. Icha Nacom barapocotsi coyeneya jopa exanaetsipae nexata painya pexui be pomonae jopa Nacom pejume cowuntsiwi pia pexui tatsi tsipae. Ichitha poxoru barapo coyene painya netsita xeinaexae Nacom daxota Nacom yawa muxuna tsitatsi xua barapo painya pexui barapoxi juntu coyene xanepanena. ¹⁵Ichacuitha pebin pon jopa pejume cowuntsin ichichipa punaxuba piowa powa pejume cowuntsiwayo. Bapoxonae bapowa bara copata xua pepunaxubiwatsi pia pebin. Barichi ichacuitha yabnyo powa jopa pejume cowuntsiwayo ichichipa punaxuba pia pebin pon pejume cowuntsin. Bapoxonae bapon bu bara copata xua pepunaxubiwatsi pia petsiriwa. Nacom copata barapomonae jopa pejume cowuntsiwixaetsi xua piseuriwi pepunapentsiwa tsipei ichichipa xua junte miya wanabarü jinompaewa tsane saya. ¹⁶Yabnyom icha ewatsiwatham tsipae xua jinya pebin pejume cowuntsinexa, daichitha jopa jume cowuntsipae Nacom. Barichi pebim icha ewatsiwatham tsipae xua jinseuri pejume cowuntsinexa, daichitha jopa jume cowuntsipae Nacom.

¹⁷Daxita paxam bewa xanepanaya pajinompaename icha pocotsi coyeneya Nacom painya nepaca catsixae tsane. Baxua bewa paexanaename xua po coyene Nacom paca yabara tsiwaba bara bequein painya seurixi paxeiname ichacuitha bara metha bequein jopa paxeinaem tsane painya seurixi. Baxuan cuiduban daxita carepaya penacaetutsi bontha pomonae Nacom pejume cowuntsiwichi. ¹⁸Ichacuitha Nacom waba xua pebin wabatsi pejume cowuntsinexa tsane. Icha barapo pebin caena bayatha wi thabatsi bu saya barabu tsane baxua. Barichi ichacuitha Nacom waba xua pebin wabatsi pejume cowuntsinexa tsane. Barichi icha barapocotsi pebin caena bayatha jopa wi thabichi bu saya barabu tsane baxua xua jopa pewi thabinexatsi. ¹⁹Bapana Nacom jopa tsita ainya cuichi, metha bequein pebin bayatha wi thabatsi, ichacuitha metha bequein jopa wi thabichi. Po coyene xua peainya cui coyene xua jiwi bewa exanaena, jame maisa bewa jiwi jume cowuntsiya exanaena pocotsiwa Nacom itoroba. ²⁰Daxita paxam bewa jupa paexana dubenanaebiyaname icha copiya paichim xua paexana dubenanaebiyame poxonae copiya aena Nacom paca waba. ²¹Poxonae Nacom waba pon paxam jiwana pam xua poxonaeru bapoxonae amanaya tanacuita pia pentacaponaein, bapon jopa bewa yabara nantu exabi baxuan xua pia saya poponaetsi. Ichitha icha bapon itacupatsi xua saya pepoponaewa bu moya saya popona xua jopa penantawenonaenexa tsane xua amanaya petanacuichiwa ichun. ²²Barichi ichacuitha pon bayatha exanatsi xua amanaya petanacuichinexa ichun bapon jume cowunta Jesús. Bapoxonae bapon naexana pon saya pepoponaein pia

pentacaponaein weya, peexanaenexa pocotsiwa Cristo itoroba. Barichi ichacuitha pon saya pepoponaein xua jopa amanaya tanacuichiyo ichun bapon jume cowunta Jesucristo. Bapoxonae bapon naexana pon Jesús amanaya pia petanacuitinchi tatsi tsipei exana pocotsiwa Cristo itoroba. ²³Nacom pin matomatha pacata matomata poxonae Jesús naetotha paca tsitupa abe painya neexanae cuiru coyenein nexa. Painya xoba pacopatame xua jiwi equeicha caewa painya nepaca itorobiwa xua abe painya neexanaewa. ²⁴Tamonae pam daxota paca itorobatsi xua painya nejume cowunta dubenanaebiyaenexa Nacom, icha paichim xua pajume cowunta dubenanaebiyame poxonae copiya Nacom aena paca waba.

²⁵Jopa xeinaeinyo po jumetha xua tacueicueijejiwa po coyenewa xua Nacom pon jiwi Pecanamataxeinaein neyaputane exana xua pomonae piseuriwi penotsiwi nexa. Saya apara paca tsipaebatsi po coyeneya xua saya tacoutha tananta xeinaewa. Ichitha paxam paca itacupa xua pata tana nejume cowuntsiwam tsipei Nacom necata barapo peyaputae coyenewa tana neantobexae. ²⁶Xan tacoya nanta xeinan xuaje: Bara bewa saya jiwi jeinya enaena. Jopa jitha peenaewa tsane, tsipei anoxuae barapo dapaetha xeinatsi nawita po coyenein bichocono nacata ayapube tsounae xua wanapapeichiwatsi. ²⁷Icha jitha paename painya xoba pana napunapentame. Barichi icha pajeinya ename painya xoba pasi cui weiweiname. ²⁸Icha jitha paename jopa apara bara abe paexanaem. Iru icha yabuyo jitha eca bapowa apara jopa abe exanaeyo. Daichitha pomonae jitha peenaewi bichocono taayapubetsi xua pejinompaewa nexa barapo cae pin nacuathe. Xan ichichipan paca yawenatsi daxota baxuan yabara paca tsipaebatsi xua pacata ayapubeyainwa xua jitha painya neenaewaxae tsipae.

²⁹Tamonae pam, paxam pomonae iru painya nejume cowuntsiwixae Jesucristo. Po coyenewa xua ichichipan tapaca tsipaebiwatsi tsainchi xua meje xua janje: “Waxainchi pin dapae jopa xeinae tsainchi po mataqueitha poxonae Jesús patopeicaena”, jan. Daxota pomonae jitha ena bewa jinompa dubenanaebiyae icha be poxonae ichi poxonae xua jinompa dubenanaebiya pomonae jeinya peenaewi xua xaniwaicha Nacom daunweya petanacuichiwatsi. ³⁰Daxita jiwi bewa eenaetsi xua Nacom petanacuita dubenanaebiyaewatsi. Daxota pomonae anthuthutane xua pewecoyeixae bu barapomonae jinompa icha ichi xua jinompa pomonae jopa anthuthutaneyo xua jopa pewecoyeixae xua daunweya penacuichixae Nacom nexa. Barichi pomonae xua bichocono juntu coyene weiweina bu barapomonae jinompa icha ichi xua jinompa pomonae jopa juntu coyene weiweinaeyo xua daunweya penacuichixae Nacom nexa. Barichi pomonae xua pecomoca dubenanaebiyaewi bu barapomonae jinompa icha ichi xua jinompa pomonae jopa pecomoca dubenanaebiyaewi xua daunweya penacuichixae Nacom nexa. ³¹Poxonae

cataunxuae pajinompame barapo cae pin nacuathe jopa paichichipa dubenanaebiyaeinde pocotsiwan xua barapo cae pin nacuathe xeina. Tsipei pocotsiwa barapo cae pin nacuathe xeina daxita weraweracaena.

³²Ichichipan xua bichocono jopa painya neyabara nanta xeinaewa pocotsiwa barapo cae pin nacuathe xeina xua paca jüntü deidejjei exana. Po pebin jeinya eca itacüpatsi xua penajüntü coyene eena exanaewa xua petaexanaewatsi Nacom pon jiwi Pecanamataxeinaein. Barapo coyene Nacom jüntü coyene weiweina exanatsi. ³³Po pebin jitha eca bapon bichocono yabara eenatsi nawita xua yabara nanta xeina nawita xua po coyeneya piseuri peewatsiwa xua daxota bapowa piseuri peyabara barü jüntü coyene weiweinaenexa. ³⁴Barapon barapo naxobe coyenewabe muxuna yawa nanta xeina. Barichi yabüxi powaxi jeinya ena irürü powaxi jitha ena barompaya tsanaya piawan yabara nanta xeina. Powa xua bapana jopa jitha ecae bapowa itacüpatsi xua penajüntü coyene eena exanaewa xua petaexanaewa po coyene Nacom ichichipa pon jiwi Pecanamataxeinaein. Barapowa ichichipa exana xua Nacom pejüntü coyene weiweina exanaewatsi tsainchi pocotsiwa xua bapowa peexanaewaxae xuano bapowa pocotsiwa penanta xeinaewaxae. Ichitha nama powa jitha eca bapowa bichocono yabara eenatsi nawita xua yabara nanta xeina nawita xua po coyeneya pia piseuri peewatsinexa xua daxota bapon piseuri peyabara bara jüntü coyene weiweinaenexa.

³⁵Baxua paca tsipaebatsi tsipei ichichipan xua tapaca cayawenaewatsi. Apra jopa paca itorobichi xua jopa painya nenotsiwa tsane painya seuriwi. Ichichipan xua beta painya nejinompaewa xua painya netanacuita dubenanaebiyenexa Nacom daxita painya jüntü coyeneintha.

³⁶Pebin irü yabüyo nanta xeinabe xua penapichinexa tsanebe. Ichitha cataunxuae ewatabe xua penapichiwa tsanebe. Bapon ichichipa nawita xua pepichiwa bapowa, irü petsiriwa bayatha wei weta. Daxota moya bara bewa napichinabe. Baxua jopa abeyo po coyene baponbe exanabe. ³⁷Ichitha icha pebin itacüpatsi xua jopa nantawenonaeyo xua pepichinexa pecotsiwa, xuano juntucuru jopa pichi tsane pecotsiwa, bara jemba tsane icha bapon pecotsiwa jopa pichi tsane. Bara saya jeinya ecaena. Bapoxonae bapon bara saya beta exana. ³⁸Pon pecotsiwa pita beta exana bequein. Ichitha nama pon jopa jitha ecaeyo bapon jame bichocono beta exana beyacaincha pon pecotsiwa pita.

³⁹Petsiriwa powa jitha eca powa pejume cowüntsiwa bewa piseuri cuicuinaena poxonae cataunxuae jopa tatüpaetsi piseuri. Icha pia pebin tatüpaetsi barapowa itacüpatsi xua pichina icha pebin pon saya pejume cowüntsin. ⁴⁰Jame metha bapowa bichocono yatsicaewa jüntü coyene weiweinaetsipa icha jopa equeicha pichipae icha pebin. Bapoxonae bapowa bichocono jüntü coyene weiweinaetsipa beyacaincha poxonae

pita icha pebin. Baxua nanta xeinan xua saya tananta xeinaewa. Matautano iruru barichin jume cowuntan xua Nacom pia Pejumope tunaxu tatsi tana nebaru poponaewa. Daxota neitacupa xua yabara tapaebiwa barapo coyenein.

**Meje xua Pablo peyabara paebiwa pexaewa po
pexaewa jiwi tajebe ibo nacomun**

8 ¹Anoxuae ichichipan xua pexaewa yabara tapacata tinaewatsi po pexaewa jiwi tajebe ibo nacomun poxonaе jiwi wunaе jainteiba ibo nacomun. Bequein xainyei xua baxuan yabara yaputainchi, daichitha barapo peyaputae coyenewan naca atsaca exana. Ichitha jame po peantobe coyenewa xeinatsi apara naca yawena xua beta wanabarun jinompaewatsi. ²Pon xua nanta xeina xua pinae yaputane bichocono bapon apara taacoibichi pocotsiwa xua bapon bewa yaputaena. ³Icha ichun Nacom antobetsi bara Nacom juntun coyene yaputane bapontha.

⁴Daxota equeicha pexaewa yabara paca tsipaebatsi, po pexaewa jiwi tajebe ibo nacomun. Barapo pexaewa xuya ichamonae xane cotacaya. Waxainchi yaputainchi xua ibo nacomun jopa xaniwaicha xeinaeyo peayaruswa xua apara saya jiwi pecobetha forota. Jame nama yaputainchi pepa Nacom, pon compa. ⁵Jiwi jume cowunta xua pinae pinmonae jinompa, pomonae nacomun, itabocotha, barapo cae pin nacuatheno. Barichino xua pinae pentacaponae jinompa itabocotha barapo cae pin nacuatheno. ⁶Nama waxainchi yaputainchi xua compa popona Nacom, pon Waxa. Daxita coyenein Nacom pia xainya werena tapichipapoinchi, bara bequein daxita baxuan Cristo forota Waxa nexa. Matautano Nacom naca cana exana pia watanacuichinexa bapon. Barichi meisa compa popona pon pepa jiwi Pecanamataxeinaein, bapon Jesucristo. Bapon Jesucristo daxita forota Nacom nexa. Waxainchi xeinatsi peajuntucoyeneswa, po peajuntucoyeneswa xua bapon naca cata.

⁷Ichamonae pomonae pejume cowuntsiwi Nacom, jopa yabara yaputaeyo xua ibo nacomun. Barapomonae awiya nanta xeina xua ibo nacom peayaruswa xeina bequein anoxuae barapomonae jume cowunta Nacom. Barapomonae bayatha pia cui xeina xua pexaewa tajebeiba ibo nacomun poxonaе wunaе jainteiba barapo ibo nacomun. Barapomonae abetha nanta xeina jeye: “Icha xaetsipan pewi po pewi ichamonae tajebe ibo nacomun metha neajuntucoyenebe cana exanaetsipa poxoru barapo pewi ibo nacomun piawa”, jei xua abetha nanta xeina. Bequein barapomonae jume cowunta Nacom ichitha jopa yaputaeyo xua ibo nacomun pia pexaewa jopa itacupaetsi xua ajuntucoyenebe cana exanatsi barapomonae icha jiwana xaetsipa barapo ibo nacomun pia pexaewa. ⁸Pexaewa jopa naca yawenaeyo xua wanajuntun coyene xanepana exanaewatsi xua daxota

Nacom wanaca weyataewa tsane. Icha waxainchi nabunatsi pexaewa jopa naca yawenaeyo xua Nacom tsita juntu coyene xanepanatsi beyacaincha xua poxonae jopa nabanaetsi. Barichi icha najainbotatsi baxua jopa naca yawenaeyo xua Nacom tsita juntu coyene xanepanatsi beyacaincha xua poxonae nabunatsi. ⁹Paca itacupa xua paxaneme xua pocotsiwa painya neichichipaewa. Icha pajiwana xaneme po pexaewa jiwi tajeiba ibo nacomun, baxua jopa paca tsita abeyo. Ichitha poxonae paexaname baxua pomonae ainya unthuton pexeinaewi, aena pejume cowuntsiwixae, barapomonaе tsita ayapubetsi. Icha barapomonaе xaena barapo pexaewa painya neexanaewaxae bequein barapomonaе tsitatsi xua abe peexanaewi poxonaе xane barapo ibo nacomun pia pexaewa tatsi. Daxota painya xoba paexaname po coyene painya neichichipaewa. ¹⁰Metha beya paca taetsipa pon pejume cowuntsin poxonaе panabaname pexaewa po pexaewa jiwi tajebeiba ibo nacomun poxonaе wunaе jainteiba barapo ibo nacomun. Iruru metha beya tsipae bapon naxaetsipa barapo pexaewa poxonaе bapon paca jain tane. Paxam pomonaе painya neyabara yaputaewi pam barapo pexaewa. Payaputaneme xua barapo pexaewa apara jopa itacupaetsi xua jiwi ajuntucoyenebe cana exanatsi. Ichitha pomonaе ainya unthuton pexeinaewi aena pejume cowuntsiwixae jopa yaputaeyo baxua yabara icha paxam paichim. Barapomonaе awiya nanta xeina jeye: “Icha barapo pexaewa xaein neajuntucoyenebe exanaena”, jei. ¹¹Ichacuiha paxaneme barapo pexaewa bequein payabara yaputaetham xua jopa abe paca cana exanaeyo. Painya neexanaexae baxua xua paxaneme barapo pexaewa daxota bichocono abe paexaname pontha pon ainya unthuton xeina, pon abetha nanta xeina, jeye: “Icha barapo pexaewa xaein neajuntu coyenebe exanaena”, jei. Daxota bapon payabara nanta xeinare xua apara iru Cristo tsitupa bapon icha ichi xua paca tsitupa. ¹²Pacata jopa abeyo xua poxonaе paxaneme barapo pexaewa. Jame apara abe paexaname poxonaе iruru xane barapo pexaewa pomonaе ainya unthuton xeina. Poxonaе abe paexaname barapomonaetha apara bara iru abe paexaname Cristotha, tsipei apara barapomonaе pomonaе iru pejume cowuntsiwixae Cristo. ¹³Metha beya xaetsipan pewito pocotsi wito xua ichun, pon iru pejume cowuntsin yabara nanta xeineiba xua jopa bapana xae po pewi xua jiwi tajebeiba ibo nacomun. Poxonaе bapon nejain tane, bapon iru xane, najuntu coyene taxoba. Bapoxonaе abe exana cana exanan. Daxota metha xanepanaetsipa icha bapana jopa xaetsipaein equeicha barapocotsi wito xua jopa taexanaewanexa xua bapon abe peexanaewa tsane.

**Meje po coyenein yabara pomonaе Jesús pia peitorobi
jiwi tatsi itacupatsi xua peexanaewa**

9 ¹Tajuntu coyene jopa netsipaebiyo xua abe taexanaewa icha xaein barapo pexaewa xua jiwi tajeiba ibo nacomun. Ichun jopa

itacupaetsi xua yabara tana neitorobiwa barapo pexaewa tsipei xan Jesús pia peitorobi jiwi jiwana tatsin. Xan bara yatsicaewa tan Jesús, pon Wanacanamataxeinaein. Paxam pajume cowuntame Jesús daunweya tatanacuichixae pon jiwi Pecanamataxeinaein. ²Ichamonae jopa neyabara tsaqueinaeyo xua xan Jesús pia peitorobi jiwi jiwana tatsin. Jame paxam pana neyabara yaputaneme xua xan Jesús pia peitorobi jiwi jiwana tatsin. Painya nejume cowuntsixae pon jiwi Pecanamataxeinaein ichamonae patsita itapeinya xeiname xua xan bara ponxaein Jesús tana neitorobin.

³Baraxua jume notan pomonaetha pomonae yabara neyainyaba xua pinae icha bara metha yatsicaewa pon Jesús tana neitorobin. ⁴Barapomonaetha janje: Bernabé iru xan bara pana neitacupabe xua pata wecobe noteibiwabe pocotsiwa xua jiwi pata necatsibiwabe pexaewa. Matautano pana neitacupabe xua pata wecobe noteibiwabe pocotsiwa paapan xua poxonae patanacuita ducunaebiyambe Jesús. ⁵Matautano icha jitha ecaetsipan bara neitacupaetsipa xua tabaru ponaewa taseuri icha Jesús pia peitorobi jiwi tatsi ichi xua itacupatsi xua peexanaewa baraxua xua piseuriwi baru warapa. Iruru barichi Jesucristo pon jiwi Pecanamataxeinaein pia peweicho jiwi tatsi baxua exana. Iru Pedro exana baxua xua piseuri baru pona. ⁶Poxonae ichamonae paca tsipaeba Nacom Pejume Diwesi, payawename barapomona pocotsiwa penantawenonaewa. Paxanbe Bernabé iru xan panacuitanbe paxam nexa poxonae Nacom Pejume Diwesi paca tsipaebatsi. Ichitha jopa pana neyawenaem pocotsiwa panantawenonanbe. Paxanbe bewa panacuichinbe icha penacuitsiwa yawa pata comocaenexa pocotsiwa panantawenonanbe. Meisa paxanbe baxua paexananbe, ichamonae jopa daichiyo. ⁷Soldadomonaepin poxonae ba naba pia pentacaponaein nexa jopa ba natamatomatsiyo pia pexaewa. Pon ba jame itoroba apata pexaewa pia soldadomona. Barichi pon ba uva pabi nacuita itacupatsi xua yawa uva cuei xaexaepona. Barichiru pon ba vaca yapu eena bapon ba itacupatsi mipi yuyucapona vaca xua peapaponaenexa. ⁸Saya jopa meisa jiwi yabara nanta xeinaeyo baxua xua pon tanacuita itacupatsi yawa xane. Aparu iru Moisés pia peitorobi coyenewatha baxua yabara paebaru. ⁹Moisés tina po diwesi pia peitorobi coyenewathaxae, xua jeye: “Poxonae po duwein pon pewun buey nanacuitapona xua pexu xu taxunaunabapona, bapoxonae pebin jopa copatsiyo xua pecoibo acatsiwa xua jopa pexaenexa. Saya bara copatsina xua yawa xaexaeponaena poxonae nacuitapona”, jei. Nacom jopa yabara paebiyo baxua xua saya meisa poxoru peyabara nanta xeinaexae buey. Jame saya aparu poxoru peyabara nanta xeinaexae jiwi. ¹⁰Nacom pana necayabara juta paeba poxonae buey yabara paeba. Baxua painta exana xua pata taneyawenaenexa. Pon ba nacobe weta xua uba pabitha, iruru pon xuya nota poxonae naweta, baponbe xeinaenabe pexaewa xua penawetsiwa.

¹¹Paxan paca cuidubatsi Nacom Pejume Diwesi. Tsipei paca yawenatsi daxota bewa xuya pana necatsibim pocotsiwa xua panantawenonan xua pata jinompaewanexa. ¹²Paxam pacatsibame pocotsiwa xua nantawenona ichamonae pomonae Nacom Pejume Diwesi paca cuiduba, ichitha paxan paca yawenatsi beyacaincha xua barapomonae paca yawena. Daxota bewa pana necatsibeibim icha paca wuqueibichipatsi beyacaincha xua pacatsibeibame ichamonae.

Ichitha baxua jopa paexanaeinyo xua pata cawucaewatsi. Paxan bichocono paatanein xua jopa pata xeinaexae pocotsiwa xua pata nantawenonaewa pata jinompeibiwanaxa bequein jopa paca wuqueibichi. Jopa paca wucaetsi tsipei jopa paichipaeinyo xua jopa painya nejume cowuntsiwa Cristo pia pexeinya jume diwesi. Jopa paca wucaetsi poxorū metha pananta xeinaetsipame xua paxan apara pata paratixichi paca tsipaebatsi Nacom Pejume Diwesi. ¹³Paxam payaputaneme xua pomonae ba nacuita Nacom pin pia botha barapomonae ba apatatsi pexaewa Nacom pin pia botha. Barichirū pomonae ba nacuita ichaxota iboto uncua po ibototha duwein bexuba xua tauta xua petuxusi exanaenexa Nacom nexa barapomonae ba itacupatsi xua xuya penabanaewa barapo duwein xua saya jiwana xane. ¹⁴Barichi Nacom pon jiwi Pecanamataxeinaein jeye: “Pomonae inta nacuita xua paeba dubenanaebiya tacapanenebiyae diwesi jume, barapomonae apatatsi pexaewa xua poxonae ichamonae apateiba be pematomaqueibiwatsi tsipei barapomonae cueicueijeji tsurubenanaebiya tajume diwesi”, jei Nacom. ¹⁵Ichitha jopa bapana wucaeinyo jiwi xua tana apatsinexa pexaewa xua be tanamatomatsiwa. Pacata tinatsi xua jopa tapaca wucaewatsi. Ichichipan xua tatupaewa tsane pewunaeya xua poxonae tapaca wucaewatsi tsainchi. Bichocono juntu coyene weiweinan poxonae tapaca tsipaebiwatsi Nacom Pejume Diwesi. Yaitama jopa pana necatsibeibim xua be pata tanematomaqueibiwam, daxota atsaquiya paca tsipaebatsi.

¹⁶Jopa neitacupaeyo xua atsacan xua tacueicueijeixae Nacom pia pecapanenebiyae diwesi jume. Nacom neitoroba xua bewa tacueicueijejwa tsane barapo diwesi. Ichitha xan tsocuaein tsipae icha jopa cueicueijan tsipae barapo diwesi! ¹⁷Bequein icha Nacom jopa neitorobichipae xua saya xan tacoutha tsipaebaponaetsipan Jesucristo pia pexeinya diwesi nexata ewatsipan xua jiwi tanematomatsinexa tacueicueijeixae barapo diwesi. Ichitha jame tsipaebaponan pexeinya jume diwesi Nacom tana neitorobixae. Jume cowuntaponan be pocotsi coyeneya Nacom neitorobapona. ¹⁸Daxota xua be tanematomatsiwa apara xua poxonae juntu coyene weiweinan tapaca tsipaebixaetsi barapo Nacom Pejume Diwesi bequein metha jopa pana catsibeibichipaem xua patanematomatsiwam, matautano metha poxonae bara tapanecatsibeibichipaem pocotsiwa tapanematomatsiwam. Paxam jopa

pana necatsim pocotsiwa be pata nematomatsiwam. Jopa paca wūcaetsi bequein bara neitacūpa xua tapaca wūcaewatsi pocotsi matoma bewa panecatsibeibim. Bara pocotsi matoma jiwi bewa catsina pomonaetha pomonae Nacom Pejume Diwesi tsipaebatsi xua pejinompeibiwa tsane.

¹⁹Bequein jopa bewa amanaya tanacuichin tsane ichun, ichitha tacoutha nacana exanan be pon amanaya tanacuichin daxita jiwi nexa. Barapo coyene exanan xua pinmonae pejume cowūntsinexa Cristo.

²⁰Poxonae poponan judiomonae pia xantha tatsi, exana ducuaenaebiyān icha be barapo judiomonae ichi xua exana dubenanaebiya pocotsiwa Moisés itoroba pia peitorobi coyenewatha. Bara pocotsi coyenein exanan xua Moisés itoroba, bara bequein jopa bewa exanaein tsane. Saya exanan tsipei ichichipan xua tayawenaewa xua barapomonae pejume cowūntsinexa Cristo Jesús. ²¹Poxonae poponan pexantha tatsi pomonae jopa exanaeyo pocotsiwa Moisés pia peitorobi coyenewatha itoroba, bapoxonae popona ducuaenaebiyān icha barapomonae ichi xua jinompa dubenanaebiya. Bapoxonae jopa exanaeinyo pocotsiwa Moisés pia peitorobi coyenewatha itoroba, xua barapomonae tayawenaenexa, xua pejume cowūntsiwanexa Jesús. Jopa paca tsipaebichi xua tajume naitematsiwa Nacom xua tana neitorobiwa. Jame bara exanan pocotsiwa Cristo neitoroba. ²²Poxonae poponan pexantha tatsi pomonae jūntū coyene faefaena Nacomtha xua pejume cowūntsiwa xua aena pejume cowūntsixae bapoxonae exana ducuaenaebiyān icha barapomonae ichi xua exana dubenanaebiya tayawenaenexa xua equeicha bichocono mataropeicha pejume cowūntsiwanexa Jesucristo. Daxita carepaya jiwitha peitūtha poponeiban, poxonae be pocotsi coyeneya jinompeiba barapo jiwi tayawenaenexa xua equeicha bichocono mataropeicha pejume cowūnteibinexa Jesucristo. ²³Daxita baxuan exana ducuaenaebiban tacueicueijeī tsaibinexa Nacom pia pecapanenebiyae diwesi jume, matautano tsipei ichichipan xua tajūntū coyene weiweinaewa tsane poxonae barapomonae jume cowūntsina Jesucristo.

²⁴Paxam payaputaneme poxonae jiwi ba namtotha cuinaepona saya caein meisa copiya patopa. Bapon ba catatsi pocotsiwa pematomatsiwatsi copiya pepatopaexae xua beta cuinaepona. Bara pocotsi jūta coyeneya ichi, beta pata exanaponde Jesucristo pia petanacuichiwa tatsi xua painya nepaca catsibinexa xua painya nepaca matomacaewan.

²⁵Pomonae ba xua nacui wūnaeta xua penaxenacaenexa ichawa jopa exanaeyo pocotsiwa taayapubetsi poxonae pecuinaeponaenexa. Barapomonae ba baxua exana pia xeinaetsi pocotsiwa pecui yabara matomacaewatsi. Barapo pentoma noxu tepa pocotsiwa xua saya caena naxuba xua weraweraca. Nama waxainchi beta exanapoinchi Nacom pia petanacuichiwa tatsi, xua Nacom wanaca catsibiwa tsane pocotsiwa wanaca yabara cui matomacaewa, pocotsiwa xua ataya ayapusū xua jopa

weraweracaeyo. ²⁶Daunweya exanaponeiban Nacom pia petanacuichiwa tatsi be poxonae xua bichoina cuinaeponan xua tatoxeincha patopaewa. Jopa exanaeinyo icha ichi xua pon naitacueinchiya jiraba. ²⁷Ichitha nama seicayiya exanan xua tapepon daunweya tacoya naitoroban xua daxota jopa abe exanaeinyo. Tapepon itoroban xua tana nejume cowuntsiwa xua peexanaewa pocotsiwa itoroban. Antuyapusuya tanacuitan Nacom tajunuwixae xua jopa beta taexanaewa xua bequein bara ichamonae cuidubithan barapo coyenein. Icha jopa beta exanaeinchipae Nacom jopa tsita xanepanaeinchipae xua daxota taneitawetsiwa tsipae.

Meje xua Pablo muxuweta pomonae wuna jainta ibo nacomun

10 ¹Tamona pam, paxam pomonae iru painya nejume cowuntsiwixae Jesucristo. Ichichipan xua painya neyaputaewa tsane po coyene xua poxonae wamo susato jiwitha pecana exanaewatsi. Barapomonae Egipto nacua weya pona. Bapoxonae tsaquinaebowa matatsun dubenapoinchi. Barapo tsaquinaebowa barapomonae matabapoinchi xua ichaxota ichichipa peponaewa barapomonae. Daxita barapomonae icha muxunene beera ꞥncababiya po pin pucua pewun Mar Rojo wun pucua. Barapo pin bicheito epatauta iyapona xua poxonae Nacom tsewa taexaniya xua be namto taexaniya. ²Barapomonae tsaquinaebowa be caemonae matatsun dubenapoinchi. Matauta barapomonae be caemonae Mar Rojo wun pucua epatauta iya pona. Barapoxonae be caemonae naexana Moisestha xua Moisés pematacapanaenexa barapomonae. Barapomonae barapocotsi juta coyeneya exana icha be poxonae jiton ichi xua poxonae bautisabatsi mentha caemonae penaexanaenexa Cristotha, xua Cristo pecanamataxeinaenexa bapontha. ³Daxita barapomonae xane po pexaewa Nacom taitorobica itaboco wetsica. ⁴Yawano barapomonae apa po mera xua Cristo itoroba ira xuepana susato tsurucuae nacuatha. Barapo mera iboton weya mene pichapa. Cristo barapo mera apatapona poxonae yanta xua barapomonae yantatsi. ⁵Daichitha pin bicheitomonae xua barapomonae jiwana jopa exanaeyo pocotsiwa Nacom ichichipa. Daxota Nacom copata xua barapomonae bara pejiwana werapaponaewa tsane barapo ira xuepana susato tsurucuae nacuatha. ⁶Baxua exana xua nacata yabara canauta jutsiya exana. Jopa bewa waichichipaewa tsainchi pocotsiwa jopa nacata wunaeyo xua icha barapomonae ichi poxonae pia coutha abe nata exana. ⁷Daxota jopa bewa wuna pajainchim ibo nacomun icha be barapomonae jiwana ichi. Barapomonae wuna jainta ibo nacomun. Nacom Pejume Diwesitha barapomonae yabara jeichi: “Barapomonae ena xua pexaenexa yawa xua peapaenexa. Bapoxonae yatsicaewa barapomonae nawiraba ibo nacom tsita nawirabatsi”, jei Nacom Pejume Diwesitha. ⁸Waxainchi jopa bewa

exanaetsi xua nasi cui weiweina exanatsi icha be barapomonae jiwana ichi. Barapomonae jiwana nasi cui exana yabuxitha xua jopa piseurixi. Daxota caentaqueitha veintitrés mil pebiwi werapa abe peexanaexae.

⁹Matautano jopa bewa najüntu coyene jujuta exanaetsi Nacomtha xua wanaca baru anaepanaenexa, icha barapomonae jiwana ichi. Barapomonae najüntu coyene jujuta exana Nacomtha. Daxota Nacom copata xua barapomonae werapa poxonae jomon sinebatsi barapomonae. ¹⁰Jopa bewa Nacom anaepanaya baru paebichi, icha be barapomonae jiwana ichi. Barapomonae Nacom anaepanaya baru paebatsi, daxota Nacom copata xua barapomonae weraweraca poxonae matatsunpin juteba po matatsunpin jiwi pejutebin.

¹¹Nacom exana daxita baxuan barapomonaetha, xua wanaca muxuweta exanaenexa xua jopa waraichiwanexa icha barapomonae ichi. Moisés yabara tina barapomonae xua yaputane wanaca exanaewa xua bara nama imoxoyo barapo nacue weraweracaena. ¹²Daxota tsipaeban pon paxam jiwana pam pon xua nayabara nanta xeina xua pinae bichocono pejume cowuntsixae peajüntucoyenesuwa xeina Nacomtha. Janje: “Dota jinya xoba abe exaname. Poxoru icha metha nanta xeinaetsipame xua jopa abe exanaem, bapoxonae metha abe exanaetsipame”, jan. ¹³Jopa meisa paxam caurimonae pia pentacaponaein tatsi paca jüntu coyene jujutsiyo. Barapara iru ichamonae pomonae pejume cowuntsiwi barichichi jüntu coyene jujutatsi abe peexanaenexa. Paxam paca itacupa xua pajüntu coyene amanayabame barapo caurimonae pia pentacaponaein tatsi. Baraxua paexaname icha barapomonae ichi xua jüntu coyene amanayaba barapo caurimonae pia pentacaponaeintha tatsi. Daichitha paca itacupa xua payabara jume cowuntame Nacom xua bara bapon paca yawenaena. Nacom jopa copatsiyo xua caurimonae pia pentacaponaein tatsi bichocono paca jüntu coyene jujutsina xua pocotsiwa bichocono pacata ayapube xua daxota abe painya neexanaewa tsane. Ichitha poxonae caurimonae pia pentacaponaein tatsi paca jüntu coyene jujuta, Nacom paca yawenaena xua painya nerucupaewa bapon weya xua daxota jopa abe painya neexanaenexa.

¹⁴Tamonae pam paxam pomonae iru painya nejume cowuntsiwixae Jesucristo. Paxam pomonae tapaca caantobe jiwichi pam. Painya xoba wuna pajaintame ibo nacomun. ¹⁵Paca tsipaebatsi paxam pomonae painya neyaputae jiwi pam. Paxam payaputaneme xua painya neyabara nanta xeinaewa pocotsiwa paca tsipaebatsi icha metha bara xaniwaicha paeban. ¹⁶Waxainchi nacaetutatsi wayabara jütanainaenexa xua Cristo wanaca tsitupaewa naetha. Bapoxonae apatsi vino mera yawa xainchi pan. Barapo vino mera Cristo pia pejana tatsi yabara caunutatsi. Matautano barapo pan Cristo pia pepon tatsi yabara caunutatsi. Poxonae apatsi barapo vino mera Nacom tsipaebatsi barapo vino mera nexa po

vino mera tsijunta eca corotiyotha. Jeichichi: “Maisa Nacom painta pexeinya coyene exaname”, jeichichi. Bapoxonae be caemonae naexainchi Cristotha waapaexae barapo vino mera. Barichi poxonae pan janacatsi be caemonae naexainchi Cristotha waxaexae barapo pan. ¹⁷Bequein waxainchi pinmonaetsi xua cae pan nabarũ xainchi, ichitha waxainchi be caemonae bapon Cristotha tsipei bara cae pan nabarũ xainchi.

¹⁸Payabara nanta xeinare xua judiomonae pomonae Israel nacuamonaepiwi. Barapomonae judiomonae xane po duwein ichamonae tauta xua petuxusi exanaewa Nacom nexa. Bapoxonae barapomonae be caemonae naexana Nacomtha. ¹⁹Jopa apara paca tsipaebichi xua ibo nacom xeina peajũntũyapusũwa. Matautano jopa paca tsipaebichi xua po wi jiwi tajeba ibo nacomũn ainya cui barapo wi beyacaincha xua icha pewi. ²⁰Paca tsipaebatsi xua jiwi tajeba pewi ibo nacomũn pomonae jopa yaputaeyo Nacom. Barapomonae tajeba barapo pewi caurimonae. Jopa apara tajebyo Nacom. Jopa ichichipaeinyo xua caemonae pana naexaname caurimonae pijimonaetha. Metha baraxua paexanaetsipame poxonae panabarũ xaneme pomonae nacaetuta pexaenexa po wi jiwi tajeba ibo nacomũn. ²¹Paxam panabaname pon jiwi Pecanamataxeinaein pia penabanaethopaewatha tatsi yawa xua paapameno. Jopa paca itacũpaeyo xua panabaname yawa xua paapameno ichaxota exanompa cauri pia cui coyene pomonae jopa pejume cowũntsiwi.

²²Icha waxainchi wũnae jaintatsi caurimonae poxonae xainchi po pewi jiwi tajeba ibo nacom bapoxonae waxainchi exanatsi xua pon jiwi Pecanamataxeinaein naca caseba pia wanaca asiwixae. Waxainchi jopa xeinaetsi po peayapusũwa xua bichocono daunwei xua beyacaincha Nacom.

**Meje xua Pablo yabara paeba xua bewa jiwi yabara
nanta xeinae pewi poxonae xane**

²³Baraxua bequein xainyei poxonae jiton jeye: “Neitacũpa xua taexanaewa pocotsiwa ichichipan”, jei bapon. Daichitha jopa daxita nacata wũnaeyo xua pocotsiwa exanatsi. Bequein waxainchi naca itacũpa xua waexana dubenanaebiyawa pocotsiwa xua waichichipaewatsi. Daichitha daxita baxuan jopa naca yawenaeyo xua wajume cowũnta dubenanaebiyawa Jesús. ²⁴Jopa bewa payabara nanta xeinaem xua saya painya coutha nexa xua painya nenayawenaenexam. Jame bewa payabara nanta xeinaem xua apara irũ ichamonae painya neyawenaenexarũ.

²⁵Po pewi pacomoqueibame po wi jiwi caenaeta pecaenaetsi bontha, painya xoba matha payabara yainyabeibame barapo pewi. Jopa payainyabinde icha metha xua apara po wi bayatha jiwi tajeba ibo nacom. Jame bara saya itatemaya paxaibare. Xain bapoxonae painya

jũntũ coyene jopa paca tsipaebiyo xua apara abe paexaname. ²⁶Nacom Pejume Diwesitha jeye: “Barapo cae pin nacue yawa xua xuan xeina barapo cae pin nacuathe Nacom pon Pecanamataxeinaein bapon piawan”, jei Nacom Pejume Diwesitha. ²⁷Poxonae jiton pon jopa pejume cowũntsin Jesús, paca tsiwaba pexaewa xua pia paca barũ xaetsi, icha paichichipame moya pana napuna xaema. Paxaema pocotsiwa xua pexaethopaewatha bobena. Jopa payabara yainyabinde barapo pexaewa icha metha barapo pewi ibo nacom werena capona. Xain bapoxonae painya jũntũ coyene jopa paca tsipaebiyo xua apara abe paexaname. ²⁸Ichacuitha metha ichũn paca tsipaebichipa, xua jeye: “Apara barapo pewi jiwi tajeba ibo nacom poxonae wũnae jainta barapo ibo nacomtha”, jei bapon. Bapoxonae painya xoba paxaneme barapo pewito. Tsipei icha barapo pewi pajiwana xaename abe exana pacana xaename pontha pon xua yabara paca tsipaeba barapo pewi. Poxoru ichamonae pomonae pejume cowũntsiwi Nacom, yabara nanta xeina xua apara jiwi abe exana icha barapo wi xane. Daxota bapon junuwa xua abe exana icha pexaewa tsane barapo pewito. Icha jopa baxua peitũtha paexanaem tsane bapoxonae bapon jũntũ coyene xanepanaya poponaena Nacomtha. ²⁹Yabara paca tsipaebatsi po coyene xua ichũn yabara nanta xeina barapo pewi pejũntũ coyenewatha. Jopa apara yabara paca tsipaebichi po coyene paxam xua payabara nanta xeiname barapo pewi painya jũntũ coyenewatha.

Ichitha metha ichũn neyainyabichipa, jei tsipae: “¿Eta pocotsiwa metha nantawenonan xua taexanaewa pocotsiwa ichũn yabara nanta xeina barapo pewi?” jei tsipae. ³⁰Equeicha metha bapon jei tsipae: “Poxonae pexaewa nabanen Nacomtha tsipaeban barapo pexaewa nexa, janje: Nacom, maisa jũntũ coyene weiweinan xua barapo pexaewa tanecatsiwam, jan. Icha baxua exanan ¿eta pocotsiwa metha nexata ichamonae abe neyabara paeba poxonae xan barapo pexaewe?” jei tsipae. ³¹Yabara paca tsipaebatsi baraxuan daxita xua xuan painya neapaewan yawa daxita xua xuan painya nenabanaewan yawa daxita icha coyeneinno xua xuan painya neexanaewan daxita bara pocotsi coyenein beta paexaneibare xua daxota poxonae jiwi paca cui taibina bapoxonae jiwi wũnae jainteibina Nacom. ³²Jopa paexanaeinde pocotsiwa xua abe paexaname xua pocotsiwa daxota ichamonae jũpa exanaena. Baraxua jopa paexanaeinde judiomonaetha, irũ pomonaetha pomonae jopa judiomona naexanaeyo, irũ pomonaetha pomonae Nacom pejume cowũntsiwichi jiwanamonae. ³³Xan ichichipan beta taexanaewa po coyene xua ichamonae tsita xanepanatsi. Jopa exanaeinyo pocotsiwa xua tacoutha taichichipaewa. Saya meisa beta exanan po coyene ichamonae tsita xanepanatsi xua po coyenewatha barapomonae peyawenaenexatsi xua pecapanenebiyaenexatsi abe pia peexanae cuiru coyenein weya.

11 ¹Paexanaponde icha be pocotsi coyeneya ichin poxonae exanaponan, tsipei exanan pocotsiwa Cristo exanapona.

Meje xua Pablo yabuxi yabara paeba powaxi poxonae ena penacacetutsi botha xua poxonae wunaen jainta Nacom

²Tamonae pam paca weyatainchi tsipei paneyabara nanta xeinaponame xua daxita coyeneyatha. Paxam paexana dubenanaebiyame pocotsiwa xua paca cuidubatsi. ³Ichitha ichichipan xua painya neyaputaewa xua Cristo canamataxeina daxita pebiwitha. Barichiru daxita pebiwi barompaya piseuriwi canamataxeina. Barichi Nacom Cristo canamataxeinatsi. ⁴Icha pebin nantasipa acata poxonae Nacomtha tsipaeba xuano poxonae cueicueijeji Nacom Pejume Diwesi, barapon Cristo jopa baru cui itura jinaetsi. Saya pia coutha ainya cui nacana exana. ⁵Jame icha yabuyo jopa nantasipa acatsiyo xua poxonae cueicueijeji Nacom Pejume Diwesi, xuano poxonae Nacomtha tsipaeba, bapowa pia pebin jopa baru cui itura jinaeyo poxonae jopa nantasipa acatsiyo paparuwatha. Bapowa tsita itapeinya xeina xua jopa exanaeyo pocotsiwa pia pebin itorobatsi. Baraxua jupa icha be poxonae ichi xua daxita matana sibatsi abe peexanaexae. ⁶Icha jopa yabuyo nantasipa acatsiyo bewa barapowa daxita nanta sibina. Ichitha icha barapowa aura xua penanta sibiwa daxota bewa nanta acatsina. ⁷Poxonae Nacom exana pebin barapo pebin Nacom cui jupatsi. Daxota barapo pebiwi xeinaru barapo pecanamataxeinae coyenewa po coyenewa Nacom xeina. Pebin jopa bewa nantasipa acatsina poxonae Nacomtha tsipaeba, xuano poxonae Nacom Pejume Diwesi cueicueijeji xua daxota pebaru cui itura jinaenexa xua Nacom pebaru cui itura jinaenexatsi. Ichitha yabuyo bewa baru cui itura jinae pia pebin, tsipei pia pebin canamataxeinatsi. ⁸Poxonae Nacom forota jopa Nacom exanaeyo pebin yabuyo weya. Saya jame Nacom exana yabuyo pebin pexainya weya tatsi. ⁹Nacom jopa forotsiyo xua pebin yabuyo tsixanatsi. Jame Nacom forota xua yabuyo pebin tsixanatsi. ¹⁰Daxota yabuyo bewa nanta acatsina penacacetutsi botha. Bapoxonae bapowa tsita itapeinya xeina matatsunpiwimonaetha xua bapowa baru cui itura jina pia pebin pecanamataxeinaexaetsi. ¹¹Daichitha pomonae Nacom pejume cowuntsiwixae, pebin nantawenona yabuyo, iru yabuyo nantawenona pebin. ¹²Bequein Nacom exana yabuyo pebin peyene weya tatsi, ichitha pebiwi ba nowaemenapona yabuxi weya. Barapo naxobe coyenewabe Nacom forota, pebin yawa yabuyo. ¹³Pananta xeinare xua icha bara xaniwaicha xua yabuyo jopa nanta acatsiyo poxonae Nacomtha tsipaeba penacacetutsi botha xua poxonae wunaen pejainchinexa Nacom. ¹⁴Wacui coyenewa ba naca yaputane exana xua pebiwichi jopa bewa antanapiya naexanaetsi. Baxota ba aura naca exana. ¹⁵Barichiru wacui coyenewa ba naca yaputane exana xua yabuxi

wɯnae exana poxonaе nantana copaba xua antanapipiya. Bapoxonaе yabɯyo pia pentanantha nantasipa acata. ¹⁶Pon ichichipa xua yabara pana nejume matsontsonoba baxuan, pajanje bapontha: “Barapo coyene pacuiduban. Mataaṭa daxita penacaetutsi bonmonaе jiwi pomonaе Nacom pejume cowũntsiwi peburɯya pana nabarɯ jɯpaya nanta xeinan tsipei icha coyene jopa payaputaеinyo”, pajan.

**Meje xua Pablo yabara paeба xua abe exana pomonaе pejume
cowũntsiwi Nacom poxonaе nainya xane po penabanaewa
cayabara nanta xeina xua Jesús pia petsitɯpaewa jiwi**

¹⁷Pacata tinatsi anoxuae xua po coyenein yabara xua jopa tana neitacɯpaewa xua tapaca tsipaеbiwatsi xua beta painya neexanaewa. Bequein pana nabarɯ nacaetutame ichitha painya jũntɯ coyene jopa paca cana exanaeyo xua paayapusɯ tsoponaem. Maisa apara abe paexaname. ¹⁸Copiya matha paca tsipaеbatsi janje: “Ichũn netsipaеба xua pinae poxonaе pana nabarɯ nacaetutame, wɯnae painya nejainchinexa Nacom, pinae ainyamonaein tsanaya pana natsabame. Bapoxonaе pinae pana najume matsontsonobame”, jan. Nanta xeinan xua apara xainyei po coyene ichamonae netsipaеба xua paca yabara paeба. ¹⁹iMoya ainya bicheiton pana naexande xain bapoxonaе pana najume matsontsonobame! iXain bapoxonaе ichamonae tane xua ichamonae petaenexatsi pomonaе jopa irɯ najume matsontsonobiyo pomonaе xua beta peexanaewi! ²⁰Bequein pana nabarɯ nacaetuteibame xua painya xaenexa pexaewa poxonaе pacayabara nanta xeiname xua pon jiwi Pecanamataxeinaein paca tsitɯpa, daichitha saya paxaneme. Apara jopa pacayabara nanta xeinaem barapo coyene. ²¹Daxita paxam carepaya barompaya pia pexaewa nainya xane. Jopa pawɯnae ewateibim ichamonae xua painya nenabarɯ xaenexa. Daxota ichamonae jainpa pomonaе cotacaya pata. Ichamonae bichocono tonsana beya poxonaе nacɯpa exana peatsaxa meran xua apa poxonaе muxuna xane pexaewa. ²²Apara paxeiname painya bon ichaxota paca itacɯpa xua pana napena jɯbame. Baraxua be paaichaxaibim pomonaе Nacom pejume cowũntsiwichi pomonaе penacaetutsi bomonaе jiwi poxonaе baxua paexaname. Aura paexaname pomonaetha pomonaе peacopeibiwi pomonaе jopa itacɯpaetsi xua capana pexaewa, pomonaе cotacaya pepatsixae. ¿Eta paca yabara jumichicuae tsainchi? Paca yabara jei tsainchi: ¿Bara beta xanepanaya paexaname jan tsane? iJume! Baxua jopa neitacɯpaeyo xua tapaca yabara paeбиwatsi.

**Meje xua Pablo yabara cuiduba pexaewa po pexaewa
poxonaе jiwi cayabara nanta xeina Jesús
(Mt 26.26-29; Mr 14.22-25; Lc 22.14-20)**

²³Po coyene xua paca cuidubatsi baxua copiya Nacom necuiduba. Paca jeichi: Po merawitha Jesús caenaetatsi pon jiwi Pecanamataxeinaein,

barapo merawitha Jesús pan pita pecobetha. ²⁴Poxonae najume weta xua paxa tsipaeba xua jei: “Axa maisa jüntu coyene weiweinan xua tanecatsiwam pan”, jei, bapoxonae pan epa janaca. Bapon barai pijimonae jeye: “Panore pan yawa paxaemano. Barapo pan neyabara caunuta xua tapepon. Tapepon inta atene exanaeinchi painya nepaca cayawenaenexa tsane xua painya tanejume cowuntsiwaxaem tsane. Poxonae baxua paexaneibame xua paxaibame panecayabara jüntanaineibare painya jüntu coyenewatha”, jei Jesús xua pijimonae tsipaeba. ²⁵Barichiya exana poxonae najain weta. Bapoxonae corotiyo pita pecobetha yawa jeye: “Pena petsiwænae muxu dutsi coyenewa paca tsipaebatsi. Barapo uva mera po mera xua corotiyotha tsijunta eca, barapo uva mera yabara caunuta tajana xua jana othoparenaein poxonae tæpæin. Barapo jana tsita itapeinya xeinaena xua jiwi pinmonae yabara jüntemainæin abe pia peexanae cuiru coyenein tatsi. Daxita coyeneintha poxonae baxua paexaneibame xua paapeibame barapo uva mera, bapoxonae panecayabara jüntanaineibare painya jüntu coyenewatha xua tapaca catsitæpæwaxaetsi”, jei Jesús, xua pijimonae tsipaeba. ²⁶Daxita tsaibi poxonae paxaibame pan yawa paapeibameno barapocotsi uva mera xua tsijunta eca corotiyotha, jiwi patsita itapeinya xeiname xua Cristo pacui yabara jüntanainame xua painya nepaca tsitæpæwa. Baxua paexaneibare beya poxonae equeicha Jesús patopaetsica, pon jiwi Pecanamataxeinaein.

Meje yabara xua poxonae jiwi bewa beta exanae xua poxonae xane po pexaewa poxonae cayabara nanta xeinatsi Jesús

²⁷Pon xane barapo pan xuano apa barapo uva mera xua tsijunta eca corotiyotha xua Jesucristo cayabara nanta xeinatsi icha bapon jopa jüntu coyene xanepanaeyo Nacomtha, apara abe exana Cristotha. Bapoxonae bapon Nacom tsita xeinatsi xua penatsicuentsiwa xua abe peexanaexae Cristo pepontha tatsi xuano xua pia pejanathano tatsi tsipei bapon jopa baru cui itura jinaeyo barapo coyene. ²⁸Daxota daxita jiwi bewa barompaya matha pewænaeya najüntu coyene cayabara nanta xeinaena. Barapo jiwi bewa nanta xeinaena icha metha bara xanepanaya exana beya poxonae xaena barapo pan xuano poxonae apa barapo uva mera xua tsijunta eca corotiyotha. ²⁹Pon xane barapo pan xuano xua apa barapo uva mera xua tsijunta eca corotiyotha xua Jesucristo peyabara xaenexa ichacuitha bapon natsicuenta Nacomtha abe peexanaexae. Bapon natsicuenta Nacomtha tsipei matha jopa yabara nanta xeinaeyo barapo pexaewa xua apara bichocono ainya cui coyenewa xeina beyacaincha icha pexaewa. ³⁰Daxota pinmonae pajiwana atenem xuano jopa xeinaeyo peajüntuyapusæwa. Daxota ichamonae bayatha pajiwana werapame. ³¹Poxonae apatsi uva mera xuano poxonae xainchi pan po pexaewa poxonae Cristo cayabara nanta xeinatsi, matha

bewa najuntũ coyene cayabara nanta xeinaetsi, xua icha metha bara wũnae waexanaewa. Bapoxonae xain Nacom jopa naca atene exanaeyo xua wanatsicuentiswaxae xua abe waexanaexae. ³²Bequein baxua Nacom nacata exana wanaca cuidubinexa xua equeicha xanepanaya waexanaenexa tsane. Nacom baxua nacata exanaena xua jopa wanaca yabara jeinexa: “Paxam abe paexaname icha ichi pomonae jinompa barapo cae pin nacuathe pomonae bichocono abe peexanaewi, pomonae jopa pejume cowũntsiwi”, xua jopa pewanaca yabara jeinexa.

³³Daxota tamonae pam poxonae pana nacaetutame xua painya nabaru xaenexa po pexaewa xua poxonae Jesucristo cayabara nanta xeinatsi, matha abũ ichamonae paewateibare. ³⁴Icha ichũn jainpa bũ bapon matha pia botha xane pewũnaeya xua poxonae napatopaena penacacetutsi botha xua poxonae wũnae jainta Nacom. Bapoxonae itacũpatsi xua bapon penaxaewa po pexaewa poxonae Jesucristo cayabara nanta xeinatsi. Bapoxonae Nacom jopa peraxa jũbi tsane bapon xua abe peexanaexae poxonae nanacaetuta pomonaetha pomonae Nacom pejume cowũntsiwichi. Poxonae paca siwa ponaeinchi xua tapaca taenexa tsainchi, bapoxonae paca cuidubinchi pocotsiwan xua yabara pana neyainyabame.

**Meje xua pejuntũ cui coyenein yabara po pejuntũ coyenein
Nacom pia Pejumope tũnaxũ tatsi amanaya cata daxita carepaya
pomonaetha pomonae Nacom pejume cowũntsiwichi**

12 ¹Tamonae pam, paxam pomonae irũ painya nejume cowũntsiwixae Jesucristo. Yabara paca tsipaebatsi po coyene ichichipan xua painya neyaputaewa. Nacom pia Pejumope tũnaxũ tatsi cata pejuntũ cui coyenein daxita barompaya carepaya pomonaetha pomonae Nacom pejume cowũntsiwichi. ²Paxam payaputaneme xua abe paexaname pewũnaeya poxonae pajume cowũntame. Pacopatame xua bara ichamonae ichawa beya paca matacapona xua wũnae painya nejainchinexa ibo nacomũn, po ibo nacomũn jopa cueicueijeiyoy. ³Daxota ichichipan xua painya neyaputaewa tsane xua poxonae jeye: Dapocotsin aibi, pon itacũpatsi xua jeye: “Jesús apara jopa Nacom Pexanto tatsi”, xua poxonae jei, icha bapon xeina Nacom pia Pejumope tũnaxũ tatsi pia peayapusũ itorobi coyenewa tatsi. Barichi dapocotsin aibi pon itacũpatsi xua poxonae jeye: “Bapon Jesús apara pon jiwi Pecanamataxeinaein”, xua poxonae jei, icha bapon jopa xeinaeyo Nacom pia Pejumope tũnaxũ tatsi pia peayapusũ itorobi coyenewa tatsi.

⁴Jiwi itacũpatsi xua daxita carepaya barompaya pexeinaewa ainya jũntũ cui coyenein pomonae pejume cowũntsiwixae Nacom. Barapo jũntũ cui coyenein jopa nacui coyene jũpaeyo. Bequein daxita jiwi xeina barapo coyenein daichitha bara saya compa pon pecatsixae apara bapon Nacom

pia Pejumope tñaxũ tatsi. ⁵Jiwi pomonae pejume cowũntsiwixae Nacom, itacũpatsi xua daxita carepaya barompaya pexeinaewa ainya petanacuichi coyenewan Nacom nexa. Ichitha meisa saya bapon Nacom compa pon jiwi Pecanamataxeinaein daxitatsi waxainchi tanacuitatsi bapon. ⁶Jiwi pomonae Nacom pejume cowũntsiwixaetsi itacũpatsi xua pexeinaewa ainya cui coyenein po coyeneinya xua Nacom petanacuichiwatsi. Ichitha daxita barapo coyenein jopa nacui coyene jũpaeyo. Saya compa Nacom pon daxita barapo jiwi cana exanatsi xua peexanaewa daxitan barapo coyeneinyatha. ⁷Nacom pia Pejumope tñaxũ tatsi tsita itapeinya xeina Nacom pia peayapusũ itorobiwa tatsi. Baxua exana poxonae Nacom barompaya naca cana exana xua beta waexanaewa wayawenaenexa tsane daxita jiwitha. ⁸Ichamonae jiwanaetha, Nacom pia Pejumope tñaxũ tatsi cata pejuñtũ cui coyenewa xua po coyene barapomonae pejuñtũ coyenetha beta yaputane xua peexanaenexa pocotsiwa pecueicueijejewa ichamonaetha. Barichi ichamonae jiwanaetha Nacom pia Pejumope tñaxũ tatsi cata pejuñtũ cui coyenewa po coyene xua beta pecuidubiwa po coyene peyaputaewa xua daunwei yabara yaputane pecana exanaenexa xua ichamonae yabara yaputane pecana exanaenexatsi. ⁹Ichamonae jiwanaetha Nacom pia Pejumope tñaxũ tatsi cata peyabara jume cowũntsi coyenewa xua daxota bapomonae nanta xeina xua bara itacũpatsi xua peexanaewa daxita coyenein xua Nacom itoroba xua bapomonae peyawenaexaetsi Nacom. Barichi ichamonae jiwanaetha Nacom pia Pejumope tñaxũ tatsi cata xua po coyenewatha peatenewi axaibi peexanaewatsi. ¹⁰Ichamonae jiwanaetha, Nacom pia Pejumope tñaxũ tatsi cata po coyenewatha pexeinya petsita itatsi coyene peexanaewa. Ichamonae jiwanaetha, Nacom pia Pejumope tñaxũ tatsi cata po coyeneya xua pecueicueijejewa Nacom Pejume Diwesi. Ichamonae jiwanaetha Nacom pia Pejumope tñaxũ tatsi cata po coyeneya beta peyaputaewa xua po coyene poxonae Nacom pia Pejumope tñaxũ tatsi jiwi cueicueijejexanatsi yawa po coyene poxonae jiwi cueicueijejexanatsi caurimonae. Ichamonae jiwanaetha Nacom pia Pejumope tñaxũ tatsi cata po coyeneya xua ichamonae pecueicueijejewa icha jumeintha, po jumein bequein jopa nacuidubiyo. Ichamonae jiwanaetha Nacom pia Pejumope tñaxũ tatsi cata po coyeneya xua barapomonae xuya jume yaputane exana po jumein xua ichamonae paeba po jumein xua ichamonae bequein jopa nacuidubiyo. ¹¹Daxita barapo juñtũ coyenein exana ducunaebiya pon Nacom pia Pejumope tñaxũ tatsi. Barapo jumope daxita coyenein meisa compa exana, po jumope Nacom pia Pejumope tñaxũ tatsi. Barapo pejumope daxita carepaya jiwitha cata icha be pocotsi coyeneya barapo jumope peichichipaexae xua pecatsiwa.

Meje yabara xua daxitatsi be caemonaetsi Jesustha

¹²Pepon bequein caein ichitha nawita xeina xua pia pecueyabiwatsi, petaxube, pesitobeno, pemaxũbeno yawa ichawanno. Barapo pepon

pecueyabiwatsi bequein ainyawan daichitha daxita bara caewa ompin naexana pepontha. Barapocotsi jüta coyeneya ichi, Cristo pinmonae xeina pia pejume cowuntsiwichi bequein bara barapon Jesús caein. ¹³Barapocotsi jüta coyeneya ichi, waxainchi seicaya jiwichi. Daichitha daxita waxainchi be caemonae jiwichi wajume cowuntsixae Jesús. Ichamonaes waxainchi jiwanaetsi judiomonaetsi. Ichamonaetsi pomonaes jopa judiomonaes naexanaeyo. Ichamonaetsi pomonaes amanaya tanacuitatsi ichamonaes nexa. Ichamonaetsi pomonaes saya wajinompawei xua saya wawan wanata exanaes jiwi. Daichitha daxita waxainchichi naca bautisaba. Waxainchi be caemonaetsi naexanatsi Nacom pia Pejumope tñaxu tatsi wanaca baru jinompaxae. Nacom daxita waxainchi barompaya carepayatsi naca cata barapo pejumope tñaxu, pon bara saya meisa caein.

¹⁴Pepon jopa xeinaeyo bara caewa xua pecueyatsiwatsi. Aparanawita xeina xuan pecueyabiwatsi. ¹⁵Metha petaxu jei tsipae: “Xan apara jopa pecobeinyo, daxota xan pepon nexa aibi”, jei tsipae. Bequein baxua paebichipa daichitha apara bara pepon cueyatatsi icha itacupatsi xua paeba. ¹⁶Metha pemuxuyoroto jei tsipae: “Xan apara jopa peitamaiqueitunyo daxota xan pepon nexa aibi”, jei tsipae. Bequein baxua paebichipa daichitha apara bara pepon cueyatatsi icha itacupatsi xua paeba. ¹⁷Icha daxita wapepon u peitacuereto tsipae, jopa naca itacupaeyo xua wajume taewa tsipae. Barichi icha wapepon daxita u pemuxuyoroto tsipae, jopa naca itacupaeyo xua watuxubiwa tsipae. ¹⁸Ichitha Nacom pitacuiya duba xua ichaxota ichichipa duba daxita baxuan xua pocotsiwan pepon pecueyabiwatsi. ¹⁹Icha daxita baxuan saya u najupaetsipa, bapoxonaes jopa xapain xeinaetsipaetsi pepon. ²⁰Bequein anoxuae nawita xeinatsi xuan wanaca cueyabiwan wapepontha, daichitha awiya bara cae pepontsi.

²¹Peitacuereto jopa itacupaetsi xua pejeiwa pecobetha: “Xam jopa cacanamatawenonaetsi”, jopa pejeiwa. Barichi pentasipa jopa itacupaetsi xua pejeiwa petaxubetha: “Paxambe jopa paca canamatawenonaetsibe”, jopa pejeiwa. ²²Po wanaca cueyatsiwa wapepontha xua jopa naca tsita ainya cuiyo, apara bara baxua ainya cui wacanamatawenonaenexa. ²³Wapepon xua wanaca cueyatsiwa xua jopa naca tsita ainya cuiyo, paparuwatha nama acatatsi xua wabarü itura jinaenexatsi. Pocotsiwa wanaca cueyatsiwa xua wapepontha xua pocotsiwa jiwi jopa benaca taeyo, naacabatsi paparuwantha wapin uraxae. ²⁴Po wanaca cueyatsiwa wapepontha pocotsiwa jiwi nacata tane baxuan jopa ainya cuiyo xua waacabinexa paparuwatha xua jopa waauraxaetsi. Nacom nacata exana pepon xua waxainchi beta nayaewatatsi paparuwatha, po wanaca cueyatsiwa wapepontha xua bichocono pecanantawenonaewa baxua. ²⁵Nacom baxuan exana xua jopa baxuan penawepu tsabinexa pepon

weya. Daxita baxuan xua wanaca cueyabiwan eenatsi xua nantiya penayawenaewa tsane icha pomonae Nacom pejume cowuntsiwichi ichi xua nantiya bewa nayawenae. ²⁶Icha barapo wanaca cueyabiwan caewa jiwana wepu atene, bara barichi pepon daxita ateneru. Matauta icha baxuan caewa jiwana ainya cui cana exanatsi bara daxita nabaru weiweinaya dubena pepontha.

²⁷Paxam Jesucristo piamonae tatsi jiwana pamxaem, caemonae pananaexaname, icha Jesucristo ichi xua xeina pia pecueyabiwatsi pia pepontha. Bequein bara caemonae pananaexaname ichitha carepaya barompaya patanacuitame Cristo. ²⁸Nacom itapeta xua pomonae pejume cowuntsiwichi xua pomonae pia petanacuichinexa tsainchi. Copiya itapetatsi pomonae Jesucristo pia peitorobi jiji tatsi. Bapoxonae iruru itapetatsi pomonae Nacom pia peitorobi jume pepaebiwi. Equeicha bapoxonae iruru itapetatsi pomonae jiji pecuidubiwi Nacom Pejume Diwesi. Bapoxonae iruru itapetatsi pomonae pexeinya petsita itutsi coyenewan exana. Bapoxonae iruru itapetatsi pomonae axaibi peexanaewi peatenewi. Iruru bapoxonae itapetatsi pomonae jiji peyawenaewi. Bapoxonae iruru itapetatsi pomonae peitorobiwi pomonaetha pomonae pejume cowuntsiwi. Iruru bapoxonae itapetatsi pomonae cueicueijeji icha jumeintha, po jumein bequein jopa nacuidubiyo. ²⁹⁻³⁰Nacom jopa apara daxita piamonae exanaeyo pomonae Jesús pia peitorobi jiji tatsi. Matautano Nacom jopa apara daxita piamonae exanaeyo pomonae Nacom pia peitorobi jume pepaebiwi. Barichi Nacom jopa apara daxita piamonae exanaeyo pomonae jiji pecuidubiwi Nacom Pejume Diwesi. Barichi jopa apara daxita jijiyo pomonae exana pexeinya petsita itutsi coyenewan. Matautano jopa apara daxita jijiyo pomonae axaibi peexanaewi peatenewi. Barichi jopa apara daxita jijiyo pomonae cueicueijeji icha jumeintha po jumein bequein jopa nacuidubiyo. Barichi jopa apara daxita jijiyo pomonae xuya piamonae yabara yaputane exana po jumein ichamonae cueicueijeji po jumein bequein jopa nacuidubiyo. ³¹Ichitha paxam bewa paichichipaename po juntu cui coyenein xua bichocono wuna po coyenein xua Nacom amanaya cata piamonaetha.

Meje xua Pablo yabara paeba peantobe coyenewa

Ichitha anoxuae yabara paca cuidubinchi icha juntu cui coyenewa po juntu cui coyenewa bichocono toxechiya wuna beyacaincha xua po juntu cui coyenein aunxuae yabara paeban.

13 ¹Metha icha bequein neitacupaetsipa xua tacueicueijejwa ainya jumein po jumein ichamonae cueicueijeji, xuano po jumein matatsunpiwi cueicueijeji. Bequein metha neitacupaetsipa daichitha icha jopa ichamonae tsita xeinaeyo peantobe coyenewa, bapoxonae saya apara pin busi jumein exanan poxonae saya cueicueijan.

²Metha xan Nacom pia peitorobi jume tacueicueijan tsipae, matautano metha yaputaetsipan daxita po coyenein Nacom moya yawun xeina xua bexa Nacom exanaena, matautano metha yaputaetsipan daxita peyaputae coyenewan, matautano metha beta jume cowuntsipan xua taneitacupaewa xua tsipaeban demxuwatha xua peponaenexa. Bequein metha xeinaetsipan daxita barapo coyenein ichitha came jopa xeinaeinchipae peantobe coyenewa barapoxonae jopa ainya cui jityno. ³Icha peacopeibi jiwitha catan daxita pocotsiwa xeinan, yawano icha caenaetan tapepon xua tanetautsinexa tatupaein tajume cowuntsixae, ichitha awiya came jopa xeinaeinchipae peantobe coyenewa daxita jiwi nexa, Nacom jopa tsita ainya cuiyuno.

⁴Jame pon xua peantobe coyenewa xeina daxita jiwi nexa bapon jame juntea popona poxonae bequein ichamonae abe taexanaetha xua bapon bequein abe taexanaethatsi. Barichi pon peantobe coyenewa xeina, bapon jame amanaya yabara nanta xeinaeya yawena ichamonae. Bapon jame jopa peyabara uwin pocotsiwa ichamonae xeina. Matautano bapon jame jopa pia coutha penayabara nanta xeinaein xua peainya cui jiton. Matautano jame bapon jopa peabbin jiwi. ⁵Barichi bapon jame jopa atsaquiya pepaebin. Matautano bapon jame jopa peyabara nanta xeinaein xua saya u piawa nexa. Bapon jame jopa peanaepanaein ichamonaetha. Bapon jame xuya jopa peyantomateibin xua xuya peexanaenexa abe bapontha. ⁶Barichi bapon jame jopa juntu coyene weiweinaeyo poxonae ichamonae abe exana. Saya bapon jame juntu coyene weiweina poxonae ichamonae bara xainyeya exana. ⁷Pon ba jame peantobe coyenewa xeina ichamonae nexa, bapon jame exanapona beta bequein ichamonae daunweya ayapubeya taexanaetha xua bapon daunweya ayapubeya taexanaethatsi. Bapon ba jame yabara jume cowuntapona ichamonae xua barapomonae pomonae ichamonaexae itacupatsi xua xanepanaya peexanaewa. Matautano bapon jame yabara jume cowuntsiya ewatapona xua ichamonae bexa beta peexanaewa tsane bequein abe peexanaewi. Matautano bapon ba saya juntea popona bequein bapon abe taexanaethatsi ichamonae.

⁸Po coyene xua jiwi antobe ichamonae barapo coyenewa bapana jopa weraweracae tsane. Jopaena matabi po matabitha jopa nantawenonae tsane xua pomonae pecueicueijeji jiwi Nacom nexa pocotsiwa Nacom yaputane exana. Barichino jopa cueicueijeji tsane icha jumeintha po jumein barapomonae jopa bequein nacuidubiyo. Matautano jopa nantawenonae tsainchi po coyene peyaputae coyenewa. ⁹Anoxuae wayaputae coyenewa nacata seica daxota be conotha yaputainchi. Matautano Nacom yabara wacueicueijejiwa nacata seica daxota be conotha yabara cueicueijeichi Nacom. ¹⁰Ichitha poxonae Cristo patopaetsica pon daxita coyenein peyaputaein bapoxonae bapon

naca yaputane exanaena po coyene xua nacata seica xua wayabara cueicueijeiba bapon, xuano xua bapon yabara yaputainchi. Barapo ainya coyenebe weraweracaena bapoxonae.

¹¹Poxonae xan awiia pexuyon cueicueijan xua najume pexuinan. Yawano nanta xeinan icha pexuyo ichi. Matautano yaputan xua pexuyoxaein. Ichitha poxonae pinyonba nacui baraxuban pocotsiwa exanaponan poxonae pexuyon. ¹²Bara juta coyeneya ichi anoxuae. Saya be conotha Nacom yabara yaputainchi. Baraxua be icha be pocotsi juta coyeneya ichi poxonae tsabocototha nayatainchi xua dādāna xua daichitha jopa nataetsi. Ichitha bexa tsane yatsicaewa Nacom pentha taeinchi peitabara. Anoxuae be conotha Nacom yabara yaputan. Ichitha bexa tsane xaniwaicha daxita beta yaputaein icha anoxuae Nacom neichi xua tanejuntū coyene yaputaewa. ¹³Acoibi po coyenewabe ataya ayapusū tsane. Meje barapo acoibi po jume coyenewabe xuaje: Pejume cowūntsi coyenewarū Nacomtha, barichi peyabara jume cowūntsiya ewatsi coyenewarū Nacomtha, matautano peantobe coyenewarū. Jame po jume coyenewa bichocono toxeinchiya ainya cui beyacaincha xua icha coyenewa barapo coyenewa jame apara xua peantobe coyenewa, xua ichamonae waantobe coyenewatsi. Barapo jume coyenewa bichocono toxeinchiya ainya cui.

**Meje xua Pablo yabara paeba xua ainya jumein pepaebiwa
yabara po jumein bequein jopa nacuidubiyo**

14 ¹Bewa paichichipaename xua painya nexainaewa peantobe coyenewa. Barapoxonae bewano paichichipaename icha jūntū coyenein pocotsi jūntū cui coyenein Nacom amanaya paca cata. Po jūntū cui coyene xua bichocono wūnae beyacaincha xua icha jūntū cui coyenewa, apara barapo jūntū cui coyenetha pacueicueijam Nacom pia peitorobi diwesi. Baxua jame bewa paichichipaename. ²Pon ba icha jumetha cueicueijeji po jumeintha xua bapon bequein jopa nacuidubiyo bapon apara tsipaeba Nacomtha. Bapon apara jopa tsipaebiyo jiwitha tsipei jiwi jopa yaputaeyo pocotsiwa paeba bapon. Pocotsiwa bapon paeba apara Nacom pia Pejumope tūnaxū tatsi cueicueijeji exana. Bapon apara paeba pocotsiwa Nacom moya yawūn xaina, pocotsiwa xua bequein jiwi jopa yaputaeyo. ³Ichitha nama seicaya pon jame Nacom Pejume Diwesi cueicueijeji jiwitha, jiwi yaputane exanaeinchi Nacom yabara. Matautano bapon poxonae Nacom Pejume Diwesi cueicueijeji yawena ichamonaetha xua barapomonaē jūntū cui coyene tsacabatsi xua Nacom pejume cowūntsiwatsi. Barichi poxonae cueicueijeji Nacom Pejume Diwesi jūntū coyene sadūjei exana pomonaē anthūthūrewē xua anthūthūtane. ⁴Pon ba cueicueijeji ainya jumeintha po jumeintha bequein bapon jopa nacuidubiyo, bapon ba saya pia coutha nayawena xua peyabara

yaputaewa Nacom. Ichitha pon ba cueicueijeji jiwitha Nacom nexa po coyene Nacom yaputane exana, bapon jiwi yaputane exainchi Nacom yabara pomonae xua Nacom pejume cowuntsiwichi.

⁵Ichichipan xua daxita paxam painya necueicueijejiwa icha jumeintha, po jumein bequein jopa panacuidubim. Jame yatsicaewa bichocono ichichipan xua painya necueicueijejiwa Nacom Pejume Diwesi ichamonaetha. Pon ba xua Nacom Pejume Diwesi cueicueijeji ichamonaetha, bapon ba jame wūnae exana beyacaincha pon icha jumeintha cueicueijeji. Ichacuitha bapon pon icha jumeintha paeba itacūpatsi xua yabara jume yaputane exana jiwitha po jumein xua pipato pepaebi jumein. Icha bapon barapo coyene exana bapoxonae bapon yawena pomonae pejume cowuntsiwi Nacom xua beta mataropeicha pejume cocowūntaponaenexa Cristo. ⁶Tamonae pam, icha poxonae paca siwa ponaetsipatsi paca tsipaebichipatsi po jumeintha jopa nacuidubinyo tacoutha, bapoxonae apara jopa paca yawenaetsipaetsi. Ichitha icha paca tsipaebichipatsi po diwesi Nacom neyaputane exana, baxua jame paca yawenaetsipa xua beta painya nejume cowuntsiwa Nacom. Ichitha icha ichacuitha paca tsipaebichipatsi pocotsiwa xua nacuiduban baxua jame paca yawenaetsipa. Mataūtano icha ichacuitha paca tsipaebichipatsi pocotsiwa xua Nacom Pejume Diwesi paeba pocotsiwa bexa Nacom exanaena, baxua jame paca yawenaetsipa. Ichacuitha icha paca cuidubichipatsi Nacom Pejume Diwesi baxua paca yawenaetsipa.

⁷Jiwi ba tanbaba po petanbabiwa arpa matawūn, xuano ba oba po peobiwa pewūn flauta. Ichitha icha barapo ainya pecajume exanaewan jopa xapain busi pichapaetsipae bapoxonae jiwi jopa xapain yaputaetsipae po wei xua icha jiwi wei tanbaba. ⁸Barichi poxonae ba jiwi naba ichamonaetha bapoxonae ba oba xua penajunutsiwa. Ichitha icha barapo busi, busi caewa, jiwi jopa xapain busi taeyo. Bapoxonae jiwi jopa itacūpaetsi xua penacui wūnaetsiwa xua penabinexa. ⁹Barichi paxamtha. Icha icha jumeintha papaebichipame jiwitha, po jumeintha bequein jopa panacuidubim, xuano irū barapo jiwi jopa nacuidubiyo bapoxonae jiwi jopa xapain paca yaputaetsipae. Baraxua apara be saya poxonae sito patsipaebame. ¹⁰Metha beya tsipae xua barapo nacuathe ainya jumein xeinaetsipa xua jiwi barompaya tsanaya pijumeintha paeba. Daxita barompaya pia matabūxūmonaein tsiniya xeina po jumein xua yaputane barapomonae. ¹¹Ichitha icha xan jopa yaputaeyinyo po jumetha xua ichūn netsipaeba bapoxonae xan be tsita tana nanapaincha poponaein xua be icha nacia werena taponaein irū bapondū be netsita penanapaincha poponaein xua be icha nacia werena peponaein. ¹²Paxam paichichipame po jūntū cui coyenein Nacom pia Pejumope tūnaxū tatsi amanaya cata piamaonaetha. Yaitama baxuan paichichipame daxota bichocono pawūcare barapo Nacom pia Pejumope tūnaxū tatsi xua painya nepaca

catsibinexa po jũntũ cui bichocono wũnae. Baxua pawũcare xua painya neyawenaenexa pomonae pejume cowũntsiwi Nacom, xua beta pejume cocowũntaponaenexa Nacom.

¹³Daxota pon icha cueicueijeí icha jumetha po jumetha bequein bapon jopa nacuidubiyo, bapon bewa wũcaena Nacomtha xua Nacom bapontha yabara jume yaputane pecana exanaenexa barapo jume. Bapoxonae bapon itacũpatsi xua yabara yaputane exana barapo jume xua ichamonae yaputane exanatsi. ¹⁴Icha icha jumetha tsipaeban Nacomtha po jume bequein jopa yaputaeyo saya apara tajumope tũnaxũ tsipaeba Nacomtha. Tajũntũ coyene jopa yaputaeyo xua tatsipaebiwa Nacom. Barichi ichamonae jopa yaputaeyo xua tatsipaebiwa Nacom. ¹⁵¿Eta xua bewa exanocuaein? Jame, bewa wũcaein Nacom tajumope tũnaxũtha po jumein jopa yaputaeyo. Mataũtano bewa wũcaein Nacom tajũntũ coyenewatha po jumein yaputan. Barichi bewa naxũnaein Nacomtha tajumope tũnaxũtha po jumein jopa yaputaeyo. Mataũtano bewa naxũnaein tajũntũ coyenewatha po jumein yaputan. ¹⁶Ichacuitha metha icha jumetha wũnae jainchipame Nacom xua nejumope tũnaxũ cueicueijeí cacana exana. Pomonae xua cajume taetsipa jopa cajume yaputaetsipae. Daxota jopa itacũpaetsipaetsi xua pebũrũya necajume notsiwa Nacom nexa, xua pejeinexa: “Bara ichi tsane”, xua pejeiwa. ¹⁷Poxonae bequein Nacomtha wũcaetsipame icha jumetha bara bequein wũnae pocotsiwa xua paebame, daichitha ichũn jopa yawenaetsipaetsi xua beta pejume cowũntsiwa Nacom. ¹⁸Nacomtha tsipaeban paxam yabara, janje: “Nacom maisa jũntũ coyene weiweinan, xua icha jumeintha tacatsipaebiwatsi, beyacaincha daxita barapomonae xua icha jumeintha catsipaeba”, jan. ¹⁹Ichitha poxonae pomonae Nacom pejume cowũntsiwichi nacaetuta penacaetutsi botha bara saya wũnae tsipae xua icha saya cinco po jumebe tacuidubiwa tsipae xua jiwi peyaputaewa tsane. Baxua beyacaincha xua poxonae icha metha cueicueijan tsipae diez mil po jumebe, po jume xua jopa nacuidubinyo. Bequein barapo diez mil po jumebe paebichipan daichitha jiwi jopa yaputaetsipae xua tacueicueijeíwa.

²⁰Tamonae pam, paxam pomonae irũ painya nejume cowũntsiwixae Jesucristo. Painya xoba pananta xeiname icha pexui ichi poxonae nanta xeina. Jame pajinompa dubenanaebiyama icha pexui ichi poxi pencuetixi xua jopa abe exanaeyo. Maisa jame pananta xeina dubenanaebiyama icha pomonae pinyon ichi xua nanta xeina dubenanaebiya. ²¹Nacom jeye pia peitorobi jume diwesitha: “Paebin barapo judiomonaetha poxonae cueicueijeí cana exanaein pomonae penanapaincha jinompaewi xua icha nacuariwi po jumein xua jopa yaputaeyo pomonae xua petsipaebixaetsi. Bequein baxua exanaein ichitha cataunxuae barapo judiomonae jopa nejume tae tsane”, jei pon jiwi Pecanamataxeinaein pia peitorobi

jume diwesitha. ²²Daxota xua pecueicueijeija icha jumeintha tsita itapeinya xeina xua pomonaetha pomonae jopa pejume cowuntsiwi xua apara Nacom atene exanaena barapomonae jopa pejume cowuntsixae. Barapo jumein jopa apara nexiyo pomonae xua bayatha pejume cowuntsiwi, poxoru Nacom jopa atene exanae tsane barapomonae. Ichitha xua cueicueijeija Nacom Pejume Diwesi, baxua tsita itapeinya xeina pomonaetha pomonae pejume cowuntsiwi xua apara Nacom yawenaena barapomonae peantobexae tsipei barapomonae Nacom jume cowuntatsi. Barapo Nacom Pejume Diwesi pecueicueijeija jopa apara nexiyo pomonae jopa pejume cowuntsiwi poxoru Nacom jopa yawenae tsane barapomonae jopa pejume cowuntsixae Nacom. ²³Ichacuitha metha patsipa painya nenacaetutswatha xua poxonae Nacom wunaej pajaintame pomonae jopa yabara yaputaeyo poxonae ichamonae pecueicueijeija icha jumeintha, iruru pomonae jopa pejume cowuntsiwi Nacom. Icha metha daxita paxam barompaya papaebichipame icha jumeintha barapomonae jopa paca yaputaetsipae. Bapoxonae barapomonae paca yabara nanta xeinaetsipa xua apara painya nepacamatajemabi jiwi pam. ²⁴Ichitha metha pebiwi patsipa painya nenacaetutswatha xua poxonae Nacom wunaej pajaintame pomonae jopa yabara yaputaeyo poxonae ichamonae pecueicueijeija icha jumeintha, iru pomonae jopa pejume cowuntsiwi Nacom. Poxonae daxita paxam Nacom Pejume Diwesi papaebichipame barapomonae paca yaputaetsipa xua papaebame. Bapoxonae barapomonae najuntu coyene cayabara nanta xeinaetsipa xua abe peexanaewa. Matautano barapomonae yaputaetsipa xua Nacom petsita natsicuentswatsi xua abe peexanaexae xua poxonae painya necajume taexae poxonae papaebame Nacom Pejume Diwesi. ²⁵Nacom exana xua barapomonae peyaputaewa po coyene xua Nacom daxita beta yabara yaputane po coyene xua barapomonae nanta xeina pejuntu coyenewatha. Bapoxonae barapomonae yaputaena xua bara Nacom junteina barapomonae abe pia peexanae cuiru coyenein tatsi. Bapoxonae pentabocototha umenaena xua Nacom wunaej pejainchinexa tsainchi. Barapomonae jei tsane paxamtha: “iJaina, maisa deta Nacom paca baru jinompa!” paca jei tsane barapomonae.

Meje xua Pablo jeye: “Beta xanepanaya paexanaponde penacaetutsi bontha poxonae wunaej pajainteibame Nacom”, jei

²⁶Tamonae pam, paxam pomonae iru painya nejume cowuntsiwixae Jesucristo. Paca tsipaebatsi xuaje: Poxonae pana nacaetutame, ichamonae painyamonae jiwana barabu naxunaena peweixi xua wunaej pejainchinexa Nacom. Ichamonae iru barabu cuidubina ichamonaetha. Ichamonae iru barabu cuidubina po coyenein Nacom yaputane exana. Ichamonae iru barabu icha jumeintha cueicueijeija

tsane po jumein bequein jopa nacuidubiyo. Ichamonae iru barabu xuya barapo jumein yabara jume yaputane exanaena daxita jiwitha po jumein ichamonae paeba. Daxita po coyenein xua paexaname bara wuna paexande poxona panacaetutame wuna painya jaintsinexa Nacom xua daxota xanepanaya mataropeicha painya nejume cocowunta dubenanaebiyaenexa Nacom. ²⁷Poxona icha jumeintha pacueicueijam bewa saya cueicueijeie nacueyatabe poyobe ichacuitha poxonae acoibi poyobe. Ichitha ichamonae ajibi tsane. Barapo acoibi poyobe bewa xuya cotacaya barompaya tsana cueicueijeie tsoponae tsane. Bewa bapoxona xuya ichun cotacaya yabara jume yaputane exanae pocotsiwan xua barapo acoibi poyobe barompaya seicaya paeba. ²⁸Ichun dapocotsin aibi pon itacupatsi xua xuya cotacaya peyabara jume yaputane exanaewa, jopa bewa barapo acoibi poyobe icha jumeintha paebi tsane penacaetutsi jiwitha xua poxona Nacom wuna pejainchinexa. Saya bewa moya pia coutha cueicueijeie Nacomtha. ²⁹Bara wuna tsipae icha saya pacopatsipame nacueyatabe poyobe xua pecueicueijeie Nacom Pejume Diwesi xua ichacuitha poxonae saya acoibi poyobe. Ichamonae bewa jume taena icha metha bara xaniwaicha paeba barapo acoibi poyobe. ³⁰Icha ichun eca baxota pon Nacom yaputane exana po jumein bewa cueicueijeie tsane bapoxona pon xua copiya asiya uncu bewa moya ecaena xua daxota barapon pon ichun itacupatsi xua cueicueijeie po jumein Nacom yaputane exana. ³¹Daxita paxam paca itacupa xua painya necueicueijeie Nacom Pejume Diwesi, painya necana exanaenexa xua daxita barapomonae penacuidubinexa. Matautano paca itacupa painya necueicueijeie painya nejuntu cui tsacabinexa daxita jiwi pejume cowuntsinexa Nacom. Ichitha jame paxam barompaya tsanaya xuya patamropatsiya cueicueijam tsopeibim tsane. ³²Pomona Nacom Pejume Diwesi pecueicueijeie barapomonae itacupatsi xua penajuntu coyene itorobiwa. Daxota barapomonae ewata xua ichun matha pecueicueijeinexa, xua bapoxonae bara pecueicueijeinexa tsane ichamonaetha. ³³Tsipei Nacom jopa ichipaeyo xua jiwi ajumeyaexa poxonae daxita jiwi peburuya cueicueijeie Nacom Pejume Diwesi. Jame Nacom ichichipa xua pomonae pejume cowuntsiwi junte ma penabarun jinompaewa poxonae nacaetuteiba xua wuna pejainchinexa Nacom.

Daxita pomona xua nacaetuta pejume cowuntsixae Jesucristo, exana xuaje: ³⁴Yabuxi bewa saya moya poxonae nacaetuta pomona Nacom pejume cowuntsiwi xua Nacom Pejume Diwesi pecueicueijeinexa. Nacom baxua jopa copatsiyo xua yabuxi pecueicueijeie baxota. Barapo yabuxi bewa jume cowuntsina pia seuriwi pocotsiwa itorobeibatsi icha be pocotsi coyeneya bayatha Moisés pia peitorobi coyenewatha paeba. ³⁵Icha barapo yabuxi ichichipa xua peyaputaewa pocotsiwa ichamonae paeba, bewa barapowaxi pia boxitha yainyabi pia seuriwi. Tsipei jopa wuna

tsipae icha yabũyo cueicueijeji penacæuttsimonaetha pomonae Nacom pejume cowũntsiwichi xua poxonae yainyaba pia pebiwi.

³⁶Paxam bewa payaputaename xua Nacom Pejume Diwesi jopa copiya matha tamropata pitabiyo painya xantha. Matautano jopa paxam compa pam pomonae meisa paxename Nacom Pejume Diwesi.

³⁷Ichamonae pomonae paxam jiwana pam nanta xeina xua xeina po jũntũ coyenewatha pecueicueijejiwa Nacom Pejume Diwesi. Barapo jũntũ coyene xua Nacom pia Pejumope tũnaxũ tatsi amanaya cata. Matautano ichamonae pomonae paxam jiwana pam nanta xeina xua xeina icha jũntũ coyenewa po jũntũ coyene Nacom cata. Daxita paxam bewa payaputaename xua po coyenein yabara pacata tinatsi xua apara Nacom wanaca itorobiwa. ³⁸Icha pebin jopa bejume cowũntsiyo pocotsiwa paeban, bapoxonae painya xoba pajume cowũntame pocotsiwa bapon paeba.

³⁹Tamonae pam, paxam pomonae irũ painya nejume cowũntsiwixæ Jesucristo. Bewa jame paichichipaename xua painya necueicueijejiwa Nacom Pejume Diwesi. Painya xoba pajume itawetame poxonae ichamonae cueicueijeji icha jumein po jumein bequein jopa nacuidubiyo.

⁴⁰Daxita beta xanepanaya paexanaponde poxonae pana nacaetutame penacæuttsi botha xua poxonae wũnæ painya nejainchinexa Nacom, xua barompaya tsanaya patamropatsiya exanaponde.

Meje xua Pablo yabara paeba poxonae Cristo equeicha asũ exainchi

15 ¹Tamonae pam, paxam pomonae irũ painya nejume cowũntsiwixæ Jesucristo. Ichichipan xua pacayabara nanta xeiname po diwesi pecapanenebiyæ diwesi jume, po diwesi paca tsipaebatsi. Barapo pecapanenebiyæ diwesi pajume cowũntame, xua daxota beta pajume cowũntsiya jinompame Nacomtha. ²Painya nejume cowũnta dubenanaebiyaexæ barapo pecapanenebiyæ diwesi, anoxuæ painya nepaca capanenebiyæ jiwi pam abe painya neexanæ cuiru coyenein weya. Barapo coyene paxeina dubenanaebiyaename icha beta payabara jũntanainame pocotsiwa paca cuidubatsi xuano icha xaniwaicha pajume cowũntame baxuan. Icha copiya jopa pajume cowũntsim tsane painya jũntũ coyenetha barapo pecapanenebiyæ diwesi bapoxonae Nacom jopa paca capanenebiyæ tsane.

³Copiya paca cuidubatsi pocotsiwa xua ichũn necuiduba xua Cristo yabara. Paca cuidubatsi xua Cristo naca tsitũpa abe waexanæ cuiru coyenein nexa icha be pocotsi coyeneya bayatha Nacom Pejume Diwesitha yabara paeba baxua. ⁴Poxonae Jesucristo tũpa bapoxonæ mũthũtha xotsi. Ichitha poxonæ acoibi po matakabibe jopa, barapo matakabitha equeicha asũ exanatsi, icha be pocotsi coyeneya bayatha Nacom Pejume Diwesitha yabara paeba baxua. ⁵Bapoxonæ Pedro

tsita naitutatsi Jesucristo. Bapoxonae equeicha Jesucristo tsita naituta pia peitorobi jiwi tatsitha pomonae doce poyobe. ⁶Bapoxonae caena equeicha Jesucristo tsita naituta pomonaetha pomonae pia pejume cowuntsi jiwixaetsi, pomonae beyacaincha quinientos poyobe jiwi. Awiya pinmonae barapo bicheito jiwamonae jinompa anoxuae pomonae xua Jesús tainchi bequein ichamonae werapa bayatha, pomonae barapomonae jiwana. ⁷Bapoxonae equeicha Santiago tsita naitutatsi Jesucristo. Bapoxonae equeicha Jesús tsita naituta daxita pomonaetha pomonae pia peitorobi jiwi tatsi.

⁸Bapoxonae nama matapainya xan Pablon netsita naituta Jesucristo. Nacom necana exana pon pia peitorobi jiwi jiwana tatsin, xua pon tabu ducuan. Xan be pon xua nainya jemeicha jume cowuntan icha be pocotsi coyeneya ichi poxonae pexuyo pena nainya jemeicha tsiperu wenaexana. ⁹Xan wepu be conotha ainya cuin pomonae Jesucristo pia peitorobi jiwi tatsi. Ichamonae pomonae Jesucristo pia peitorobi jiwi tatsi bichocono ainya cui beyacaincha xua xan. Bequein Nacom neyabara caunuta xua xan Jesucristo pia peitorobi jiwi tatsi jiwanan ichitha auran tsipei bichocono abeya exanan pomonaetha pomonae penacaetutsimonae jiwitha pomonae pejume cowuntsiwi Nacom. Pebaraxuaxae jopa bewa neyabara caunutsi baxua. ¹⁰Ichitha xan nama anoxuae seicayiya exanan Nacom taneyawenaexae. Bapon tana neantobexae jopa abeya taexanaeinyo. Jame nama seicaya bichocono ayapusuya nacuitan Jesucristo nexa beyacaincha ichamonae pomonaexae Jesucristo pia peitorobi jiwi tatsi. Ichitha xan jopa tacouthinyo xua tanacuichiwa, apara jame Nacom neyawena tana neantobexae. ¹¹Jopa ainya cuiyiyo pomonae bayatha paca cuiduba Nacom Pejume Diwesi. Jopa ainya cuiyiyo icha ichamonae pomonae Jesús pia peitorobi jume pepaebi jiwi bayatha paca cuiduba. Matautano jopa ainya cuiyiyo icha xan bayatha paca cuidubatsi. Saya jame ainya cui xua daxita paxan nanta jupaya tapaca cuidubiwatsi barapo Nacom pia pecapanenebiyae diwesi jume xuano xua painya nejume cowuntsiwa baxua.

**Meje xua Pablo yabara paeba pomonae xua equeicha
asu exanatsi petupae cuiru coyene weya**

¹²Paca cuidubatsi xua Cristo equeicha asu exanatsi petupae cuiru coyene weya. Daichitha pomonae paxam jiwana pam paeba xua pinae Nacom jopa equeicha asu exanaeyo jiwi petupae cuiru coyene weya. ¿Eta xua nexata metha baxua paeba painyamonae jiwana? Bara bayatha payabara yaputanemeba. ¹³Icha jiwi jopa equeicha asu exanaetsipaetsi petupae cuiru coyene weya, bara nexata Cristo barichipaetsi, jopa equeicha asu exanaetsipaetsi petupae cuiru coyene weya. ¹⁴Icha Cristo jopa equeicha asu exanaetsipaetsi petupae cuiru coyene weya, bapoxonae

jopa ainya cui tsipae pocotsiwan paca cuidubatsi. Bapoxonae baxua be xua pejumexaei tsipae tsipei jopa paca yawenaetsipae. Matautano barichi painya nejume cowuntsiwa jopa ainya cui tsipae jopa painya nepaca yawenaexae tsipae. ¹⁵Icha baxua xaniyei paxan be pomonae pemuxutorobi jiwi pan tsipaein pocotsiwa Nacom payabara paeban, tsipei paxan apara papaeban xua Cristo equeicha asu exanatsi petupae cuiru coyene weya. Papaeban xua Nacom equeicha Cristo asu exanatsi petupae cuiru coyene weya ichitha baxua jopa xainyeyo icha jiwi jopa equeicha asu exanaetsi petupae cuiru coyene weya. ¹⁶Icha petupae jiwi jopa equeicha asu exanaetsipaetsi petupae cuiru coyene weya, barichi Cristo bayatha jopa equeicha asu exanaetsipaetsi petupae cuiru coyene weya. ¹⁷Icha Cristo jopa equeicha asu exanaetsipaetsi petupae cuiru coyene weya bapoxonae jopa paca yawenaetsipae xua painya nejume cowuntsiwa. Daxota awiya paexana dubenanaebiyaetsipame abe painya neexanae cuiru coyenein. ¹⁸Icha baxua xainyei tsipae xua Cristo jopa asu exanaetsipaetsi petupae cuiru coyene weya bapoxonae pomonae xua bayatha werapa bequein jume cowuntsitha tsipae Jesús, ichitha weraweracaetsipa xua abe peexanaexae. ¹⁹Waxainchi jume cowuntsiya wunaewatatsi xua bexa tsane Cristo naca asu exanaena poxonae werapaeinchi. Ichitha icha saya jume cowunta dubenanaebiyaetsipatsi xua Nacom wanaca yawenaewa tsane barapo cae pin nacuathe, bapoxonae wajume cowuntsiwa jopa naca yawenaetsipae xua po coyene Nacom bexa asu wanaca exanaewa tsane poxonae werapaeinchi. Bapoxonae jiwi pomonae jopa pejume cowuntsiwi naca yabara jei tsipae: “iPai barapomonae tsobenae beyacaincha ichamonae bequein jume cowuntsitha tsobenae!” xua wanaca yabara jeichiwa tsipae.

²⁰Ichitha pocotsiwa xua yatsicaya jame xainyei, apara jame xua Cristo bara yatsicaya asu exanatsi petupae cuiru coyene weya. Bapon Cristo copiya jiwi asu canamata exanatsi xua petupae cuiru coyene weya pomonae xua ataya tsitecaeya peasunexa xua jopa weraweracaeyo.

²¹Jiwi abe peexanae cuiru coyenein peexanaexae daxota werapa, tsipei jiton copiya abe canamata exana, bapon Adán. Nama jiwi equeicha asu exanatsi, tsipei jiton copiya asu canamata exanatsi, bapon Jesucristo.

²²Jiwi werapaena icha Adán ichi abe peexanaexae. Daxita pomonae Cristo piamonae tatsi equeicha asu exanaeinchi petupae cuiru coyene weya icha Cristo cana ichichi xua asu exanatsi xua petsitecaenexa.

²³Nacom iche tsane xua poxonae exanaena xuaje: Copiya matha Cristo asu exanatsi. Bexa tsane pomonae Cristo piamonae tatsi asu exanaeinchi petupae cuiru coyene weya poxonae Cristo equeicha patopaetsica barapo irathe tsique. ²⁴Cristo weraweraca exanaena daxita, xua peitorobi coyenewan. Matautano muxuna weraweraca exanaena xua nacuan peewatsi coyenewan. Matautano muxuna weraweraca exanaena

peayapusya itorobi coyenewa po peayapusu itorobi coyenewa xua jopa Nacom pia coyenewa tatsi. Bapoxonae poxonae wetsina daxita, Cristo pia peayapusu itorobi coyenewa Paxa caewa catsina, pon Nacom. ²⁵Tsipei Cristo bewa tsiwanaya exanaponaena daxita jiwitha be pon jiwi itorobiya pia pepa peewatsinchi. Baxua bewa exanaena beya poxonae Nacom weraweraca exanaena pomonae Cristo pia peaitafaetabi jiwichi. ²⁶Po coyene Nacom cotacaya exanaena xua apara piamonae asu cana exanaena xua bapana jopa peweraweracaewa tsane. ²⁷Tsipei Nacom Pejume Diwesitha paeba xua pinae Nacom itorobina Pexanto pon Jesucristo xua itorobiya pecanamataxeinaenexa daxitantha. Bequein bara Jesucristo daxitantha itorobiya canamataxeinaena saya Paxatha meisa jopa itorobiyo tsane. ²⁸Copiya Nacom exanaena xua Cristo itorobiya canamataxeinaena daxitantha. Bapoxonae Cristo Nacom Pexanto tatsi pia coutha nacana exanaena xua Paxa itorobiya pecanamataxeinaenexa tsainchi. Bapoxonae Nacom xaniwaicha itorobiya canamataxeinaena daxitantha.

²⁹Ichacuitha ichamonae bautisabatsi pomonae pewerapaewi tsibautisabatsi xua barapomonae equeicha peasunexa pepatsinexa Nacom pia nacuatha. Icha pewerapaewi jopa equeicha asu exanaetsi petupae cuiru coyene weya bapoxonae barapomonae pomonae pewerapaewi jopa yawenaetsi bequein petsibautisabithatsi xua ichamonae bautisabatsi xua peasunexa pomonae werapa. ³⁰Daxita matabi jinompeibatsi xua naca peipeita ichamonae xua naca abe exana wajume cowuntsixae. Icha jopa equeicha asu naca exanaetsipae jopa ainya cui tsipae xua wacueicueije tsurubenaebiwa Nacom Pejume Diwesi. ³¹Tamonae pam, paxam pomonae iru painya nejume cowuntsiwixae Jesucristo. Daxita matabi muxu tatupeibi xua ichamonae tanepeipeita exaneibixae. Baraxua xaniyei icha ichi xua xaniyei xua juntu coyene weiweinan xua Jesucristo pon Wanacanamataxeinaein xanepanaya peexanaexae painya xantha. ³²Xan bara imoxoyo tatupae poxonae Efeso tomarapiwi inta abe exana. Barapomonae baraxua necana exana icha neuthu ichi poxonae ichun waetabatsi. Bequein barapomonae baxua necana exana xua muxu tatupae ichitha jopa asu neexanaetsipae petupae cuiru coyene weya icha jiwi equeicha jopa asu exanaetsipaetsi. Icha jopa equeicha caewa asu naca exanaetsipae bara saya exana dubenanaebiyaetsipatsi pocotsiwa ichichipatsi. Poxonae baraxua exanatsi jupa exanatsi icha ichamonae ichi pomonae jopa peyabara jume cowuntsiwa xua bara asu peexanaewatsi. Barapomonae jeye: “Anoxuae nabanaeinchi yawa apaeinchi, tsipei baya werapaeinchi jopa naca tsita ainya cuiyo”, jei barapomonae, pomonae jopa pejume cowuntsiwi.

³³Painya xoba pacopatame xua bara ichamonae painya nepaca muxuitorobeibiwa. Jiwi ba pia pecayabara juta pepaebi diwesiyo ba jei:

“Pomonaē abe peexanaewi cuiduba ichamonaetha pomonaetha pomonaē ichipa beta exana, xua barapomonaē abe peexanaenexa”, ba jei barapo diwesiyo. ³⁴Equeicha caewa paexande po juntu coyene xua bichocono Nacom tsita xanepanatsi. Painya xoba equeicha abe paexaname. Ichamonaē paxam jiwana pam jopa Nacom yaputaetsi. Baxua paca tsipaebatsi xua painya neuranexa.

Meje po coyeneya xua Nacom exanaena poxonaē jiwi equeicha asu exanaeinchi petupaē cuiru coyene weya

³⁵Metha ichun yainyabina, jei tsane: “¿Eta po coyeneya Nacom exanaena poxonaē pewerapaewi equeicha asu exanaeinchi? ¿Eta pocotsi pepon barapomonaē xeinaena?” jei tsane. ³⁶Barapo peyainyabiwa saya pejumexaei. Poxonaē paubame peubi xuto, barapo xuto burana bocareca iratha xua pexu nantafobabinexa poxonaē xua nae pexuwinexa. ³⁷Poxonaē paubame jopa apara pepaboto paubim xua pepa nae pexuwinexa. Jame apara ba pexu paubame, metha beya xua trigo xuto tsipae, ichacuitha metha icha pexuton tsipaeno. ³⁸Cotacaya Nacom exana xua barapo pexu xuwa icha be pocotsi coyeneya Nacom ichichipa. Daxita peubi xuton tsanaya seicaya pia cui barompa poxonaē xuwa. ³⁹Barichi jiwi pepon daxita jopa najupaeyo. Jiwi pia pepon seicaya tsanaya barompa. Duwei unupiwi pia pepon seicaya tsanaya barompa. Duwei menepiwi seicaya pia pepon tsanaya barompa. Pepupunaewi seicaya pia pepon tsanaya barompa. ⁴⁰Peitabocotha xeina ainya pepon po ainya pepon peitabocotha pejinompaewi nexa. Barichi barapo irathe xeina ainya pepon pomonaē barapo irathe pejinompaewi nexa. Po pepon pexeinya peitupanaē coicha xeina xua peitabocotha jinompa barapo pepon bichocono pexeinya pepon. Barichi wapepon pexeinya pepon po pepon xeinatsi po cae pin nacuathe. ⁴¹Xometo poto atsato pia pexeinya peitupanaē coicha barompa. Barichi jomocoichato pia peitupanaē coicha barompa. Opiteino pia peitupanaē coicha barompa. Icha opitei pia peitupanaē coicha jopa nacoicha jupaeyo icha opiteiontha po opiteiton pia peitupanaē coicha xeina. ⁴²Barapocotsi juta coyeneya ichi pomonaē xua equeicha asu exanatsi petupaē cuiru coyene weya. Poxonaē pomonaē pewerapaewi iratha muthucatsi equeicha caewa tsorobo naexana petsabanaexae. Bapoxonaē equeicha Nacom asu exanaena pena pepon xua petsitecaenexa. Barapo pena pepon bapana jopa tupaē tsane equeicha, jopa petsabanaexae tsane. ⁴³Barapo peru pepon jopa xeinaeyo peitupanaē coicha poxonaē muthutha xotsi. Ichitha jame barapo pena pepon xeina pexeinya peitupanaē coicha. Barapo peru pepon jopa xeinaeyo peaswa poxonaē muthutha boca. Ichitha jame barapo pena pepon xeina peaswa. ⁴⁴Barapo peru pepon saya barapo cae pin nacuathe nexa. Daxota poxonaē tupa, tsabana naexana, tsorobo

equeicha caewa penaexanaenexa. Ichitha poxonae barapo pepon asu exanaeinchi, bapoxonae pena pepon naexanaena pejumope tunaxu nexa xua Nacom pia nacuatha peponaenexa. Icha jiwu xaina peru pepon xua barapo cae pin nacuathe nexa, barichi pena pepon xainaena xua Nacom pia nacuatheicha nexa.

⁴⁵Nacom Pejume Diwesitha jeye: “Po jiton copiya Nacom forota, bapon Adán. Bapon peaswa xaina xua pepoponaenexa barapo cae pin nacuathe”, jei Nacom. Ichitha Cristo Adán bichocono toxeincha ainya cuichi equeicha caewa asu peexanaexaetsi. Daxota bapon Cristo itacupatsi xua ichamonaetha cana exana xua pexeinaewa peajuntuyapuswa xua po peajuntuyapuswa ataya tsiteca. ⁴⁶Copiya jopa xainaetsi po pepon Nacom pia nacuatha nexa. Saya copiya xeinatsi po pepon barapo cae pin nacuathe nexa. Ichitha cotacaya bexa tsane xinaeinchi po pepon pena pepon Nacom pia nacuatha nexa. ⁴⁷Po jiton copiya exanatsi, pon tsorobo weya exanatsi, bara bapon apara saya barapo cae pin nacuathe nexa. Po jiton xua cotacaya patopa bapon apara Cristo pon itaboco wepatopeica. ⁴⁸Po jiwu xua barapo nacuathe jinompe pia pepon exanatsi icha Adán ichichi xua pia pepon tsorobo weya exanatsi. Ichitha pomonae Jesucristo piamonae tatsixae barapomonae xainaena pepon icha ichi xua pocotsi pepon xaina Cristo, pon xua itaboco wetsica pona. ⁴⁹Anoxuae wapepon werapaena icha Adán pia pepon tatsi ichi xua bayatha tupa. Ichitha poxonae Nacom pia nacuatha patinchi wapepon xinaeinchi pocotsi pepon icha Cristo pia pepon tatsi ichi xua pexeinya peitupanae coicha xaina.

⁵⁰Tamonae pam paxam pomonae iru painya nejume cowuntsiwixae Jesucristo, yabara paca tsipaebatsi po pepon yawa jinompatsi. Barapo pepon jopa naca itacupaeyo xua wayawa patsiwa Nacom pia peitorobi nacuatheicha xua ataya tsitecaeya wajinompaenexa tsane, tsipei barapo pepon tupa. ⁵¹Paca tsipaebatsi pocotsiwa xua namicha xua jiwu jopa yabara yaputaeyo xua Nacom moya yawun xaina. Daxita pomonae waxainchi jiwunatsi jopa weraweracae tsainchi xua ataya tsane. Ichitha daxita waxainchi xinaeinchi icha pepon. ⁵²Poxonae trompeta matawun asiya obina xua poxonae Nacom daxita wetsina, bapoxonae Nacom jemeicha nainya asu exanaena pomonae pewerapaewi pomonae pejume cowuntsiwixae Cristo. Baxua nainya exanaena icha be pocotsi juta coyeneya ichi poxonae jiton nainya naichaquetabiya necotaba. Pewerapaewi asu exanaeinchi xua equeicha bapana jopa peweraweracaenexa tsane. Bapoxonae waxainchi pomonaetsi cataunxuae jinompatsi nainya icha pena pepon xinaeinchi. ⁵³Wapepon po pepon tsorobo weya naexana bewa naexanaena icha pepon xua jopa weraweraca exanaetsi. Wapepon xua itacupatsi xua pewerapaewa, bewa pepon naexanaena po pepon xua jopa werapaeyo. ⁵⁴⁻⁵⁵Wapepon xua weraweracaena Nacom equeicha asu

exanaena pena pepon po pepon jopa weraweracae tsane. Poxonae baxua exanaena jopa weraweracaeayo. Yawa barapo pepon itacupatsi xua werapa ichitha barapo pepon naexanaena po pepon xua jopa werapaeyo. Bapoxonae baxua nayabara jume cui weta xua exana pocotsiwa bayatha Nacom Pejume Diwesitha tsiwunae yabara muxu duta. Nacom Pejume Diwesitha jeye: “Poxonae Nacom pena pepon cana exanaena piamonae, bapoxonae Nacom amanayabina pontha pon jiwi tupa peexanaein”, jei Nacom Pejume Diwesitha. ⁵⁶Pocotsiwa xua naca amanayaba, apara xua wawerapaewa abeya waexanaexae. Pomonae exanaetha pocotsiwa Moisés pia peitorobi coyenewatha itoroba, barapomonae awiya werapa poxoru barapomonae awiya abe peexanaexae. ⁵⁷Paxan pajan Nacomtha: “Nacom, maisa pajuntu coyene weiweinan xua pata tanecatsiwam jinya neayapusu itorobi coyenewa pata amanayabinexa abe peexanae cuiru coyenein. Barapo coyene pana catame xua poxonae Jesucristo pon pata Necanamataxeinaein naetotha pata tana tsitupaexae”, pajan.

⁵⁸Tamonae pam, paxam pomonae tapaca caantobe jiwichi pam. Painya neamanayabixae abe painya neexanae cuiru coyenein, pana najuntu ayapusu exande Nacomtha. Painya xoba payabara cui copatame xua bara ichamonae paca cana exanaena xua icha coyeneya painya neexanaewa tsane. Ataya beta panacuita dubenanaebiyama Nacom nexa. Tsipei paxam payaputaneme po penacuichiwa Nacom pata tanacuita dubenanaebiyame, bara Nacom tsita xanepanatsi.

**Meje xua Pablo paratixi yabara paeba po paratixi jiwi catsiba
ichamonaetha pomonaetha pomonae pejume cowuntsiwi Nacom**

16 ¹Yabara paca tsipaebatsi paratixi po paratixi penacaetutsimonae jehebapona ichamonae nexa pomonae pejume cowuntsiwi Nacom. Paexande icha pomonae penacaetutsi jiwimonae ichi xua exana pocotsiwa itoroban pomonae Galacia nacuamonaepiwi. ²Daxita domingo wun maticabintha paxam daxita barompaya painya paratixi pajiwana wetsabiya pajehebaponaename pocotsi matoma pana busi matoma xeineibame. Pomonae pin matoman nabusi matoma xeineiba bewa ainya paratixi jehebaponaena. Pomonae tsiqui matomaxi nabusi matoma xeineiba bewa cae paratixi jehebaponaena. Abi paratixi pajebare xua jopa painya neexanaewa tsane baraxua xua poxonae equeicha patopaein. ³Poxonae patopaein bapoxonae paitapetsiname pebiwi po pebiwi pecaponaenexa carta. Barapo pebiwi Jerusalén tomara beya caitorobin carta. Barapomonae carta caponaena yawa muxuna caponaena paratixi po paratixi pajehebaponaename Jerusalén tomarapiwi nexa pomonae pejume cowuntsiwi Nacom. ⁴Icha nanta xeinaein xua yapu wunaein paratixi penawichixae metha moya bara ponaetsipan Jerusalén tomara beya. Bapoxonae barapomonae nepuna ponaena.

Meje xua Pablo yabara nanta xeina, xua pewarapaewa tsane

⁵Poxonae ponaein, bewa Macedonia nacua iyan tsane. Bapoxonae cotacaya paca siwa ponaeinchi Corinto tomaratha. ⁶Metha beya paca baru ecaetsipatsi be caentacabiyobetha. Ichacuitha metha poxonae awubo paca baru ecaetsipatsi. Bapoxonae poxonae weta xua awubo, paca itacupa xua pata neyawenaewam pocotsiwa nantawenonan poxonae warapaein icha tomara beya. ⁷Jopa ichipaeinyo xua saya bara caetha tapaca siwa ponaewatsi. Jame ichichipan xua be pecono daepayobe tapaca baru ecaewatsi tsainchi poxonae patopaein. Baxua exanaein icha Nacom baxua inta copatsina. ⁸Ecan xote Efeso tomaratha beya poxonae matakabi jopaena po matakabi pewun Pentecostés. Barapo matakabi po matakabi jiwi yabara juntanaina xua poxonae matha Nacom pia Pejumope tñaxu tatsi patopa penacaetutsi jiwitha pomonaetha pomonae pejume cowuntsiwi. ⁹Anoxuae neitacupa xua bichocono tatanacuichiwa Nacom xua jiwi pinmonae pejume cowuntsinexa barapo tomaratha. Ichitha ayei jiwi ichichipa abe necana exana xua jopa taexanaenexa tsane.

¹⁰Ichu Timoteo patopaena painya xantha, pantenta weyataema xua bapon juntema pepoponaenexa painya xantha. Baxua pata exande poxoru bapon exana pocotsiwa Nacom ichichipa, icha xan ichin xua exanan pocotsiwa Nacom ichichipa. ¹¹Daxita paxam jopa payabara jande: “Apara bapon Timoteo pewowin, jopa apara peyaputaen”, jopa payabara jande. Jame maisa bapon payawende xua equeicha juntema caewa peponaenexa taxainya berena. Baxua paexande tsipei xan iru ichamonae pomonae iru pejume cowuntsiwixae Jesucristo, panabarũ wũnae ewatan bapon xua Timoteo paewatan.

¹²Apolos pon iru pejume cowuntsin matowa tsipaeban xua painya nepaca cataenexa xua bapon pecueyabinexa tsainchi ichamonae pomonae iru pejume cowuntsiwixae Jesucristo. Ichitha bapon nanta xeina xua anoxuae jopa yapu jupaetsi xua peponaewa tsane xua painya nepaca siwa ponaewa. Bapon ponaena ichitha poxonae tayapu jupaeinchi.

Meje poxonae Pablo najume wetsiya paeba

¹³Dota pam, pomonae xua abe pacata exana. Beta paajuntũsũya pajume cowunta dubenanaebiyama. Paexana dubenanaebiyama icha pebiwi ichi xua jopa cunuwiya exana dubenanaebiyaeyo xua beta peexanaewa. ¹⁴Daxita pocotsiwan xua paexaneibame, peantobe coyenyatha paexaneibare ichamonaetha.

¹⁵Tamonae pam, paxam pomonae iru painya nejume cowuntsiwixae Jesucristo. Paxam payaputaneme xua Estéfnas piamonae tatsi copiya jume cowunta Jesucristo Acaya nacuatha. Barapomonae bichocono yawena ichamonaetha pomonaetha pomonae iru pejume cowuntsi jiwi

Nacom. ¹⁶Paca tsipaebatsi xua paxam xuya paexana dubenanaebiyama pocotsiwan barapomonaе paca itoroba. Pabarũ nacuire barapomonaе xuano ichamonaе irũ pabarũ nacuitame pomonaе jũpaeya exana icha barapomonaе ichi. ¹⁷Maisa bichocono jũntũ coyene weiweinan xua Estéfanas irũ Fortunato irũ Acaico xote pate. Barapomonaе inta exana pocotsiwa jopa paca itacũpaeyo xua painta exaname xua jopa xote tapaca barũ ecaexaetsi. ¹⁸Barapomonaе nejũntũ cui coyene tsacaba exana xua xaniwaicha tapoponaenexa Nacom nexa. Barichi irũ baxua pacata exana. Beta paweyataename barapocotsi jiwimonaе.

¹⁹Pomonaе penacaetutsimonaepiwi, pomonaе pejume cowũntsiwi Nacom, pomonaе Asia nacuatha jinompa, barapomonaе paca jacobа. Aquila irũ piowa tatsi Prisca, irũ pomonaе petanacaetutsi dubenanaebiyae jiwichi pia botha tatsi, barapomonaе bichocono paca jacobа peantobe jiwixae xua peantobexaetsi pon jiwі Pecanamataxeinaein. ²⁰Daxita pomonaе pejume cowũntsiwixae Cristo pomonaе xote jinompe daxita paca jacobа. Betiya painta nantiya pana najacobare painya neantobewaxae Cristo.

²¹Xan Pablon pacata tinatsi po diwesiyo xua cotacaya opi ducua. Yatsicaya tacoutha tacobe couya pacata tinatsi tapaca jacobinexatsi.

²²Icha ichũn jopa Jesucristo antobetsi pon jiwі Pecanamataxeinaein barabũ Nacom itawetsina pexainya weya, xua bapon be pon abe peexanae jiton tsane. ¡Xam ponxaem Pata Necanamataxeinaem nainya antha patopare!

²³Barabũ Jesucristo pon jiwі Pecanamataxeinaein paca yawenaena pia paca nepaca caantobewaxae xua xanepanaya painya nejinompaenexa. ²⁴Daxita paxam pacata itorobatsi po coyene xua tapaca caantobe coyenewatsi taantobewaxae Cristo Jesús.

Baja Pablo.